

Boyekoli Milimo Mabe

Ngámbo Ya Basámbeli



Nazali komituna bato boni bayebi mwa loyembo oyo, wana nazali kopesa bino mbote na móto ya bondeko ya Boklisto mpe bolingo ya Klisto lelo, bato boni bayebi mwa loyembo oyo: “Atalaka Makambo Na Yo”? Boyebi yango? Malamu, tótala soki tokozua yango. Oyebi yango, ndeko mwasi? Oyebi yango? Sikoyo:

Atalaka makambo na yo,
Atalaka makambo na yo;
Na mói to na butu,
Atalaka makambo na yo.

Oh, ezali malamu. Tómeke yango lisusu sikoyo.

Atalaka makambo na yo,
Atalaka makambo na yo;
Na mói to na butu,
Atalaka makambo na yo.

[Maloba mazangi na bande—Mok.]

² Tata na biso na Likoló, totondi Yo ndenge Yo otalaka mpenza makambo na biso, mpe osili kotalisa bolingo na Yo epai na biso, na lolenge ete Otindaki Mwana na Yo Moko ya bolingo, mpo na . . . Mwana na Nzambe oyo ayebi mabe te, mpo na kozua esika ya basumuki bakwéyi. Totondi Yo mingi, ndenge Otalaki makambo na biso mpe Omitungisaki mpo na biso, mpo na kosala likambo oyo! Mpe tozali kozongisa matondi mpenza, Nkolo. Tozali na esengo ya kosangana awa nsima ya nzanga oyo, na nsé ya mapata, mpe kosenga mapamboli na Yo likoló na liyangani oyo. Nkolo, sala ete mobali, mwasi, mwana mobali to mwana mwasi nyonso oyo azali awa, áyekola na bozindo sikoyo Makomi. Tozali kobunda na mokili oyo ekonkami na Satana. Mpe, Tata, tobondeli, wana tozali koyekola nguya ya milimo mabe mpe makambo oyo basalaka na bato, ete Opesa biso kondima monene, mpe tika ete bilembo mpe bikamwa mingi ya minene ésalema. Mpamba te, tosengi yango na Nkombo na Klisto mpe mpo na nkembo na Nzambe. Amen.

³ Nsima ya nzánga oyo, tozali koyekola, nokinoki, nakanisi, pene na miníti zomi na mitano liboso na ntango. Tozali kokóba na *Boyekoli Milimo Mabe*.

⁴ Sikoyo, nauti koyamba nsango moko, kala mingi te; Ndeko Beeler, euti na baninga na ngai. Mpe nakobanda na Afrika,

na katikati ya sánza ya Nsambo. Boye, likambo yango esili, tosili kobongisa yango sikoyo. Ndeko Baxter akokoka kokende na ntango wana te, boye nakosengela kokende na Afrika ngai moko. Boye kokende kuna ná . . . tika ete . . . Bosengeli kobondela mpo na ngai sikoyo, ete Nkolo ásungá ngai, mpamba te nakosengela mpenza na yango sikoyo, kuna katikati na . . . Nazotalela kosangisa bato koleka nkóto nkama mibale na mayangani yango.

⁵ Mpe nazuaki emononeli moko nakomaki yango awa. Nalingi ete bino bózua litómba na yango. Esalemaki na sanza ya Zomi na mibale. Nazalaki na chambre, na ntóngo moko, mpe Mwanje na Nkolo akotaki kuna. Ngai . . . Bomoni, ntango nazalaki kuna, natósaki Nzambe te, mpe nazuaki ba-amibe. Moto nyonso ayebi—ayebi oyo amibe ezali, ezali parazíte oyo ekómaka . . . ekoki koboma moto. Mpo nasalaki likambo oyo Nzambe ayebisaki ngai ete násala te. Bato boni basílá koyoka lisolo yango? Nakanisi bayike kati na bino oyo bazali awa. Nayebi ete bato ya tabernacle bayóká lisolo ya likambo oyo esalemaki. Nzambe ayebisaki ngai nákende na esika moko, ete nátikala mosika na esika *oyo*, mpe názonga mpo na kokende esika mosusu. Mpe natikaki ete batei bándimisa ngai ndenge mosusu. Sikoyo, batei bazali bato malamú mpenza, mpe bazali bandeko na ngai, kasi bóyókaka likambo oyo Nzambe ayebisi bino. Ya solo. Bomoni? Bozali na etínda moko.

⁶ Bato boni bazali koyeba lisusu, na eleko moko boye, ezalaki na basakoli mibale na Biblia? Moko na bango, Nkolo ayebisaki ye, Alobaki: “Kende na esika *songolo*. Mpe komeka te—komeka te koya na . . . Okozonga na nzela mosusu,” mpe bongo na bongo. Mpe—mpe Alobaki: “Komeka kolia to komela te, na ntango okozala kuna.”

⁷ Mpe mosakoli mosusu ya solo akutanaki na ye, mpe alobaki: “Nkolo akutanaki na ngai, nsima na Ye kokutana na yo.” Mpe alobaki: “Yaka na ndako na ngai.” Mpe mosakoli yango andimelaki makambo oyo mosusu wana alobaki, mpe abungisaki bomoi na ye mpo na yango. Bomoni, básalaka oyo Nzambe ayebisi bino ete bósala, ata moto mosusu nani alobi nini.

⁸ Sikoyo tozali . . . Na emononeli oyo, Ye . . . Yango elamusaki ngai, mokolo ya zomi na misato na sanza ya Lib- . . . to ya Zomi na mibale. Mpe—mpe wana nafandaki na mopanzi ya mbeto na ngai, nazalaki komituna oyo ekokómela ngai nsima na mikolo. Ngai . . . Ntango nazongaki awa, balingaki kobwaka ngai na lopitalo ya bato na bokono mabe, etikalaki moke ba-parazíte yango éboma ngai. Minganga batalaki nzoto na ngai, ntango nakómaki na mboka oyo. Mpe, na ngolu na Nzambe, batikaki ngai názonga na ndako, mpo epanzanaki mingi. Nabondelaki, mpe nakendeki epai ya batei yango, nalobaki: “Nkolo ayebisaki ngai ete nálanda nzela wana te.”

Balobaki: “Oh, Nzambe akoki mpe koloba na moto mosusu libanda na yo.”

⁹ Nalobaki: “Kore mpe azuaki likanisi wana na ngonga moko.” Na bongo, kasi nakendeki kobuka nkasa mpe natiaki yango likoló ya makolo na bango, mpe nalobaki: “Bómikanisela, na Nkombo na Nkolo, soki tosali mobembo wana kokende kuna, tokolonga te, mpe biso nyonso tokofuta mpo na yango.” Mpe tofutaki mpenza mpo na yango! Oh la la! Bisu nyonso tolingaki kokufa. Boye, ntango nazongaki. . .

¹⁰ Makambo ya kobundisa yo ezalaka mingi na bikólo ya bapaya wana. Ndakisa, soki mwa liyanzi moko eswi yo, ekosala ete ózua fievre. Mpe mwa eloko wana, ntango eswi yo, soki oyoki mokusa, okoki kokwanza yango te. Otali, soki ezali mwa nyama moko ya moindo, kobenda yango te. Ezali na motó ya moke, ekótaka na kati ya loposo, ebalukaka *boye*, mpe ekangamaka wana. Soki obendi yango, motó na yango ekokatana mpe ekotikala na kati. Ezali na virus moko na kati na yango, ekoki ko-paralizé yo. Boye a . . . Kokwanza yango te, to kobenda yango te; zua kaka mafuta ya nyama moko. Mpe epémaka na mokongo na yango. Tangísá mafuta yango likoló na yango, mpe ekobima.

¹¹ Lisusu, ezalaka na mwa ngungi moko. Asalaka makelele ata moke te. Ayaka na nzela ya mopepe. [Ndeko Branham amibeti na loboko—Mok.] Soki kaka esimbi yo, esili, ozui malaria.

¹² Mpe—mpe lisusu, ezalaka na nyoka moko, oyo babengaka mamba. Soki eswi yo, okotikala kaka na miníti pene na mibale, nsima na yango koswa yo.

¹³ Ezalaka mpe na cobra moko ya jaune. Okotikala na bomoi pene na miníti zomi na mitano, nsima na yango koswa yo. Mpe moko na yango epusanaki pene ya mwana na ngai ya mobali, wana akokaki kotia loboko na ye likoló ya motó na yango. Esilaki kotómbwana, mpo na koswa, liboso ete tókoka kobeta yango masasi, ndenge wana.

¹⁴ Ezalaka mpe na cobra ya moindo. Oh, kuna nyonso ezalaka! Lisusu, makámá ya banyama ya zamba mpe ezalaka, na ntembe te, bankosi, nkoyi motane, to bankoyi, ná makambo mosusu ya kobunda na yango, na kati ya zamba. Mpe lisusu, maláli, maláli ya ndenge na ndenge ezalaka kuna.

¹⁵ Mpe osengeli kobunda na nyonso wana soki okei kuna. Libanda na yango, banganga nkisi mpe bazali kuna mpo na kobeta móndengé ná yo, na ngámbo nyonso, bomoni, ná kisoloka na bango mpe nyonso wana. Kasi, ezali mpenza likambo ya kokamwa, komona ndenge Nkolo na biso alongolaka yango, ngámbo na ngámbo, ndenge wana, na bongo kokóba.

Mpe mokolo wana, nazoyeba lisusu, natelemaki wana, ndenge likambo yango esalemaki malamumu, nakoyebisa bino yango mokolo moko, na liyangani mosusu, mpo nalingi kokóta na

motó ya liteya na ngai nsima ya nzánga oyo, na ntina na *Boyekoli Milimo Mabe*.

¹⁶ Kasi sikoyo, mpe nazalaki kokanisa na ntina na likambo oyo, wana nafandaki wana, nsuka ekozala ndenge nini? Mpe ntango tozongaki awa, nayebi ete bato pene na nkóto mokama babongolaki mitema, ntango tozalaki kuna. Mpe mobange Ndeko Bosworth ayaki epai na ngai. Alobaki, nalobaki: “Ee, Ndeko Bosworth?”

¹⁷ Alobaki: “Nazali na lipombó na ntina na yo, Ndeko Branham!” Alobaki: “Ozali kaka—ozali kaka na ebandeli ya bomoi na yo,” alobaki bongo.

¹⁸ Nalobaki: “Ee, ngai nakanisi ete esili nde.” Nalobaki: “Naleki mibu ntuku minei. Nabanzi nasili kobunda etumba malamau mpe nasilisi kopota mbangu.”

¹⁹ Alobaki: “Oleki mibu ntuku minei?” Alobaki: “Nazalaki na mibu wana liboso ete nábongola motema.” Alobaki: “Ngai nazali naino mpenza malamau.” Etikalaki moke ákóma na mibu ntuku mwambe. Mpe bobele. . .

Namilobelaki: “Ee, ntango mosusu ezali ya solo.”

²⁰ Boye, alobaki: “Te, okómi nde Branham moko ya sika mpenza sikoyo. Oyebi ndenge ya kokamba mayangani na yo malamau, mpe nyonso wana.” Alobaki: “Soki okoki mpenza kobeta Amerika na ndenge esengeli, ná mayangani ebongisami na lolenge malamau, na esika oyo okoki kotikala mpóso motoba to mwambe na esika moko, mpe ofandisi likambo yango malamau, mpe opanzi nsango yango zingazinga,” alobaki, “okosala likambo, kasi, mpe mpo na Nkolo na biso.” Bongo, tokendeki liboso, tokobaki ndenge wana, boye, ezalaki mpenza—mpenza malamau.

²¹ Nsima na mwa ntango, namonaki emononeli moko, ntango nakómaki na Amerika, eyelaki ngai, mpe ezongisaki ngai na Afrika, mpe elakisaki ngai liyangani moko wana, oyo esalemaki kuna na ngámbo ya Durban. Mpe liyangani ya liboso elimwaki malembe-malembe na kati ya histoire, kokendéké na ngámbo ya westi. Liyangani ya mibale eyaki pe, mpe ntango eyaki, ezalaki kutu na bato mingi koleka liyangani ya liboso. Mpe A. . . Nayokaki kogánga moko, mpe Mwanje moko azalaki koya uta na Likoló; Azalaki na pole monene.

²² Mpe Mwanje ya Nkolo oyo atelemaka pembeni na biso awa, azalaki- . . . azalaka ntango nyonso na loboko na ngai ya mobali, na ngámbo *oyo*. Mpe Etelemaki wana, Ezalaki—Ezalaki kozunguluka-zunguluka. Mpe namonaki Moto oyo kotelema na nsé na Ye. Azali—Azali te. . . Sikoyo, oyo wana ezalaka emononeli te, soki omoni Ye. Ezalaka mpenza likambo ya solo, ndenge bozali kotala ngai. Ee, okoki koyoka Ye kotambola mpe kosolola na yo. Mpe ntango A. . . Ata eloko nini, ezali mpenza likambo ya solo. Mpe ezali emononeli te; Mobali yango

atelemaka mpenza wana, kaka ndenge bino bozali wana. Mpe mongongo na Ye ezalaka mpenza kaka lokola oyo ya ngai to oyo ya yo okaki kozala. Kasi emononeli, ezali eloko moko ebimi liboso na yo mpe omoni yango, ndenge wana. Kasi Mobali oyo apusanaka mpe atelemaka wana.

²³ Boye, Ayebisaki ngai ete . . . likambo nini elingaki kosalema. Mpe Alobaki ete . . . Mwanje oyo akitaki, mpe Ayebisaki ngai nábaluka mpe nátala na ngámbo *oyo*. Pe emonanaki lokola na ngámbo ya Inde, sikoyo. Nalobi te ete ezali na Inde, kasi ezali pembeni na yango. Kasi bazalaki bato ya Inde.

²⁴ Mpamba te, bato ya Afrika bazalaka milai, minene, bingambe. Bamosusu kati na bango bakómaka na molai ya metre mibale na centimetre zomi, na bozito ya, oh, kilo mokama na ntuku mibale na nsambo, mokama na ntuku misato na motoba, bingambe. Ba-Zulu, sikoyo, ba-Songai ná ba-Suto, mpe, oh, ezali na bikólo ebele ya ndenge na ndenge. Bikólo zomi na mitano ya kokesene, bafandaki kuna, mokolo wana, nazalaki koteya bango.

²⁵ Soki nalobi liloba moko, ndakisa: “Yesu Klisto, Mwana na Nzambe.” Nakokaki kokende komela mái liboso ete balímboli nyonso básilisa kolimbola yango. Moko akokaki koloba . . . Mpe makeléle ya ndenge na ndenge!

Nazaláká kokanisa, ntango nayókáká ba-Pantekotiste koloba minoko na sika, ete ntango mosusu moko alobi na lolenge moko boye mpe mosusu alobi na lolenge mosusu, ekokaki kosalema mpenza ndenge nini? Kasi nandimi ete Biblia ezali solo, mpe nayebi ete Ezali bongo, ntango Elobaki: “Lokito moko ezalaka te, oyo ezangi ndimbola.” Ya solo.

Bamosusu bakokaki koloba, moko na bango akoloba: “Blrr blrr blrr blrr,” elingi koloba “Yesu Klisto, Mwana na Nzambe.” Mosusu akoloba: “Kluk kluk kluk kluk,” elakisi “Yesu Klisto, Mwana ya Nzambe,” na monoko na ye. Boye, ata lokito ezali ndenge nini, ezali na ndimbola moko esika moko boye. Ya solo. Ata makeléle ya ndenge nini yango ezali, elingi koloba eloko moko mpo na moto moko, esika moko. Mpe ntango Azalaki . . . Bazalaki kolimbola yango.

²⁶ Mpe namonaki ete na loboko na ngai ya mwasi, ntango Mwanje yango akitaki mpe namonaki lokola lisanga moko kuna, ezalaki bato oyo bazalaki ná . . . emonanaki lokola bafinikaki ba—ba—drá, *boye*, ezingaki bango mpe ekangamaki, ndenge bazingaka bebé na kúshe. Ezalaki bongo. Mpe nazalaki komona mosika mpenza, ezalaki eloko mosusu te, kaka bato. Na nsima, Mwanje oyo apelisaki mwinda moko ya makasi oyo eninganaka, mpe ebandaki kokende kozonga, ndenge *wana*. Natikálá komona bato ebele mpenza bongo te na bomoi na ngai!

²⁷ Na nsima, Mwanje mosusu oyo apusanaki mpenza pembeni na ngai, mpe Alobaki: “Bato nkóto nkama misato bazali na

liyangani wana.” Nasilaki kokoma yango awa. Bino mpe bókoma yango na lokasa, ndenge nalobáká mpo na mwana mobali oyo alingaki kosekwa na Finlande. Bókoma yango na lokasa oyo etikalaka mpamba na Biblia na bino to esika moko boye, ete na liyangani oyo (Liyangani moko ekosalema. Mpe bokoyoka yango na nzela moko boye.) bato nkóto nkama misato bakoya na liyangani yango. Sikoyo, bokomona soki ezali ya solo te. Oyo wana ekozala na bato mbala misato, koleka mosusu wana. Bomoni? Bato nkóto nkama misato bakozala na liyangani yango. Mpe nazali na esengo mpenza ya kokende kuna, nayebi te nini kosala, mpo nasepelaka kolónza milimo mpo na Nkolo na biso.

²⁸ Mpe kuna, na mbala moko, komona—komona bapakáno ya solosolo nkóto ntuku misato koya epai na Yesu Klisto na kobengama na etumbelo kaka moko, bapakáno ya solosolo nkóto ntuku misato.

²⁹ Sikoyo tókende na liteya na biso nokinoki. Lobi toyekolaki tekiniki ya milimo mabe. Nazalaki kokanisa lelo, wana Nzambe azali kosala. Boyebi te eloko nini oyo bonsomi ya kobima ezalaka. Sikoyo, ngai nazali molakisi te. Nazali mosika mpenza mpo na kozala mo—molimboli ya Biblia. Mpe nazali . . . Kelasi na ngai esukaki na kelasi ya nsambo. Boye, yango ezali . . . Mpe, yango, natikaki kelasi eleki pene na mibu ntuku mibale na mitano, boye, eleki mpenza ntango molai. Mpe natángá mingi te, kasi nyonso oyo nayebi ezali oyo nazuaka na nzela na mpémélá. Mpe soki mpémélá yango ekokani na Biblia te, na bongo ezali lokuta. Bomoni? Esengeli kozala Biblia. Ata soki mpémélá yango ezali nini, esengeli koya . . . *Oyo* nde Mobóko ya Nzambe yango. Mobóko mosusu etiami te bobele Oyo. Mpe likambo Oyo ezali, soki oyo nalobi ekeseni na Oyo, bótika ete maloba na ngai ézala lokuta, mpamba te Oyo nde Solo. Bomoni? Bomoni? Mpe soki mwanje moko ayebisi bino likambo oyo ekeseni na Oyo, Polo alobaki: “Tika ete álakelama mabe mpo na bino,” ata mwanje ya Pole. Sikoyo, makambo minene mingi ezali. Ngai kaka . . . moko kaka . . . naponi mikolo mibale, mpo na koteya bato liteya oyo, ezalaki lobi ná lelo, mayangani ya nsima ya nzángá.

³⁰ Sikoyo, ntina oyo nasali oyo, ezali mpo námeke ngai moko mwa moke, komona soki Nzambe akosunga ngai. Eloko moko ezali na motema na ngai. Mpe ezali ete nsima na Nsango ya nkembo oyo, mpe nsima na Nzambe Ye moko kotatola ete oyo nalobi ezali Solo, kati na Liloba na Ye; na nzela ya Liloba na Ye, liboso, na nsima, na nzela na bilembo mpe bikamwa. Sikoyo, nakanisi, ná Solo ya Nsango—malamu epai na Lingomba, natindami na makasi, liboso na Nzambe, ete námema likambo oyo na Lingomba. Ya solo. Baza ya kokabwana mpenza, na bibongiseli ebele ya ndenge na ndenge mpe na biteni ya bitonga na yango, na lolenge ete ekómi mabe. Bisó nyonso tozali bana na Nzambe, na ntango tobotami mbala mibale, Yango, bomoni. Mpe

solo ya likambo yango ezali ete, Nzambe alingi ete tóyeba yango, ete tozali bana na Ye.

³¹ Sikoyo, bómikanisela, tempelo ya Salomo ekatamaki biteni-biteni na mokili mobimba. Mpe ezalaki na libanga moko egúmbámá lolenge *oyo*, mpe libanga mosusu egúmbámá lolenge *wana*, mpe moko ekátáná lolenge *oyo*, mpe mosusu ekátáná lolenge *wana*, kasi, ntango eyaki elongo, makeléle ya ekáteli ezalaki koyokana te, makeléle ya martó mpe te, eloko nyonso etiamaki mpenza na esika na yango. Nzambe nde azalaki Mopesi-mitíndo na yango.

³² Nzambe azali na lingomba moko, ebengami na nkombo ya ba-Assemblée, mpe mosusu église de Dieu, mpe moko *songolo*, mpe mosusu *pakala*. Mpe, kasi ntango bango nyonso basangani, bakokóma etónga moko monene ya bolingo na bandeko, mpe Nzambe akotia, akosangisa Lingomba yango mpe akonétola Yango na likoló.

³³ Liyemi nyonso oyo eyebani mingi, liboso ete étiana na etutú ya ndako ya ntóki, esengeli kotiana, koleka na ndako ya ntóki ya matóngi, liboso. Moto oyo ayemaki . . . ? . . . , to, bólimbisa ngai, nabosani nkombo na ye, moto oyo ayemaki Elambo ya Nsuka, ata bongo, ezuaqi ye bomoi na ye mobimba. Ayemaki liyemi yango. Elekaki pene na mibu ntuku mibale, to mibu zomi, nabanzi, mpo na koyema Klisto ná Yudasi. Mpe, boyebaki yango ete, na kati ya liyemi liyebani mingi wana, ete kaka moto oyo azuamaki mpo na koyema Klisto, nsima na mibu zomi, azuamaki mpo na koyema Yudasi? Ya solo. Asalaki yango. Mibu zomi ya lisumu, kolongwa kozala moyémbi monene ya operá, mpo na kozua esika ya Klisto, mpe kozua esika ya Yudasi. Yo otindami kozua mibu zomi te. Ekozua miníti zomi, ekopesa yo mbano ndenge moko. Ekobongola ezaleli na yo, na lisumu. Kasi, ata bongo, liyemi yango elekaki na matóngi ya ndenge na ndenge.

³⁴ Yango nde likambo oyo nakanisaka na ntina na Lingomba na Nzambe, etonga oyo ebengami. Ee, nazoloba yango te mpo na kosala mpasi. Nanáná ba-mái ya mbu nsambo, mpe nazali kati na mobembo na ngai ya misato zinga-zinga na mokili, mpe bato balobaka: “Motúntuki! Motúntuki!” Mpe nasili kolukaluka mokili mobimba, mpe natikálá komona naino motúntuki moko te. Wana ezali nkombo oyo zabolo asili kobamba bato. Esili. Eloko moko lokola motúntuki ezalaka te. Mpe nazali na statistique ya mangomba nyonso oyo ezali, nkama motoba na ntuku motoba na mwambe, mpe ekómi bibongiseli na mokili mobimba, ezali na moko te kati na yango oyo babengaka Batúntuki. Mpe yango euti na letá. Ezali na lingomba moko te ya Batúntuki oyo ngai nayebi. Boye, ezali kaka eloko moko oyo zabolo apesá nkombo yango. Kasi, sikoyo, kati na nyonso oyo, na makambo nyonso oyo, Nzambe asili koyema elilingi moko. Mpe, na ntango moko, mwa mangomba mike mike oyo ezaláká awa, bamosusu na bino . . .

³⁵ Natalaka mibali oyo ná suki ya mpembe. Mwana na ngai ya mobali, lobi; nazalaki na biró, koyekoláká, mpe motei moko alekelaki wana mpe alobaki: “Nalingi kopesa papa na yo mbote ya loboko.” Ya solo, mwana na ngai ya mobali akoli elongo ná Ndeko Baxter ná bamosusu, oyo balobaka kaka “te,” esili, mbala moko. Nasepelaka na yango te. Bomoni? Ata soki ngai. . . Na ntembe te, nakoki kozala mosali ya bato mpe ya Nzambe te, na mbala moko. Kasi nakanisi ete nasepelaka kopesa bandeko na ngai mbote ya loboko. Nasepelaka kosala yango. Ezalaka na eloko moko ná yango, nasepelaka kopesa mbote ya loboko ná mo—motei. Na motei kaka te, kasi na mwana na Nzambe nyonso, nasepelaka kosala yango. Nayebaki yango te, kino ntango mwasi na ngai ayebisaki ngai yango nsima na mwa ntango. Ee, soki akokaki koyebisa motei yango: “Zela naino, azali kobondela kuna, mpe—mpe nakotala nini ye akoloba.” Ee, wana, wana elingaki kozala malamú koleka. Boye, nasembolaki ye mwa moke na likambo yango, ete ásalaka bongo te. Bomoni?

³⁶ Na bongo, ezali ya solo, okoki koya kaka mbala moko te, ndenge ndeko alobaki eleki mwa ngonga. Soki osali bongo, boye na mpokwa na—nalembaka nzoto, bomoni. Bato babandaka koloba, mpe ntango mosusu moto moko na moko azali na bokono, mpe soki babandi kolobela yango, nokinoki, Mwanje ya Nkolo akoya wana mpo na kolobela yango.

³⁷ Moto moko afandi kuna, azotaláká ngai sikoyo, ayebi ete likambo ezali ya solo, euti kosalema kala mingi te, to eleki pene na ngonga moko na ndambo. Mwasi moko azali awa, oyo ayebaki te nini yango ezalaki, Mwanje ya Nkolo asololaki na ye mokolo mosusu wana na mpokwa mpe ayebisaki ye likambo moko, kasi akokaki kososola likambo yango te. Kasi lelo likambo yango esalemi, boye, ayebi sikoyo eloko nini yango elingi koloba, ntango Azalaki kosolola na ye. Mpe ntango nazalaki wana kosololáká na ye, Mwanje ya Nkolo ayaki na mbala moko mpe ayebisaki ye mpasi na ye ezalaki nini, mpe likambo yango nyonso, mpe—mpe eloko nini ye azalaki kokanisa, ná moko na balingami na ye, mpe ndenge Nzambe autaki koloba mpe alobaki ete Asilaki kotatola yango, mpe eloko nini ekosalema. Boye, ekosalema mpenza ndenge wana. Bomoni? Nzambe asilaki koloba bongo.

³⁸ Ee, sikoyo, bongo mpo na mbala moke oyo etikálá. . . Na bongo, mpe emononeli moko na moko, elembisaka yo mingi koleka, bomoni. Mpe, na mbala moko okomona, ntango okómi na losambo, na mpokwa, okomi ya kolemba mpenza na lolenge ete okoyeba mpenza mpenza te likambo ya kosala. Mpe bóbondelaka mpo na ngai sikoyo, bomoni, mpamba te ezali kolongwa na liyangani moko kino na mosusu, kino na mosusu. Soki ezalaki kaka liyangani moko oyo, elingaki kozala ndenge mosusu, soki nazalaki nde kozonga ndako sikoyo, mpe nalingaki kosala eloko moko te na basánzá mibale to misato, kobima kuna mpe kozua

ndóbo na ngai mpo na kokende kolóbo mbisi. Kasi nasengeli kokende longwa na liyangani moko mbala moko na mosusu, longwa na moko mbala moko na mosusu, bomoni. Yango nde esalaka yango.

³⁹ Mpe bino nyonso bóbondelaka, bino baoyo awa na eyanganelo. Bayebisaki ngai, lobi na mpokwa, ete na—ete nazalaki koloba na moto moko boye, kasi moto yango ayanolaki na mbela te. Sikoyo, ezali na likama monene, bomoni. Ntango balobaki ete. . . Ee, mbala mingi, miinda oyo engengaka te, esika moko ezalaka na molili na katikati ya oyo kuna.

⁴⁰ Mpe natalaka Mwanje ya Nkolo, ntango Atelemaka awa, ngai nakoki koyoka yango. Na nsima, nakoyoka Yango kotika ngai, mpe nakotala malamau, Ekotika ngai, mpe Ekokende esika moko boye mpe Etelemi wana mwa moke, mpe nakoki komona Yango. Mpe Ekongenga, bongo emononeli moko ekoya. Na bongo nakomona emononeli yango. Nakotala malamau lolenge ya moto oyo azali kuna. Soki namoni moto yango, na nsima nde nakoloba. Yango nde likambo oyo esalemaka. Yango nde likambo oyo ekomaka. Otindami te koyebisa bato nyonso likambo wana, kasi yango nde—yango nde oyo esalemaka, bomoni. Nyonso wana esalemaka na ngámbo ya molimo.

⁴¹ Na bongo, soki moto yango ayanoli te, ekozala lokola kotánga Biblia oyo, mpe koloba: “Likambo Yango ezali na ntina te,” mpe opesi Yango mokongo. Bomoni? Boye, wana ezali mpenza malamau te. Boye, bózalaka na ekéngé, bózalaka koyókáká, bózalaka na bokebi. Ntango Ye alobi, yanola. Bomoni, bóbélemaka mpo na koyanola na ntango nyonso.

⁴² Na bongo, mwasi na ngai, ná Ndeko Beeler mpe mingi na bango, na ntongo oyo, bazalaki koyebisa ngai yango, ete ezalaki kolobela moto moko mpo na ndeko na ye ya mobali, na esika moko boye, oyo azalaki na likambo moko oyo ezalaki kotambola malamau te ná ye, mpe bongo na bongo. Kasi mobali yango ayanolaki na mbela te, boye, eloko ya kosala ezali te. Oyo wana etali Nzambe ná mobali yango. Emononeli yango etikaki ngai. Na nsima, namonaki yango lisusu te, mpo ayanolaki te. Boye, bózalaka na bokebi, bózalaka na ekéngé.

⁴³ Sikoyo, tokozua liteya oyo ya *Boyekoli milimo mabe*, mpe tozolobela milimo mabe. Sikoyo, bato, soki olobi “molimo mabe,” mbala moko, babandaka kokanisa: “Oh, bofanatiki moko boye to eloko moko boye!” Kasi milimo mabe bazalala mpenza ya solo, lokola Baanje. Bazalaka mpenza ya solo.

⁴⁴ Mpe zabolobela azalaka mpenza molimo mabe, ndenge Yesu Klisto azali Mwana na Nzambe. Ye azali molimo mabe! Likoló ezalaka mpenza ya solo. Mpe soki eloko lokola lífelo ezalaka te, Likoló mpe ezalaka te. Mpe soki lipamboli ya Seko ezalaka te. . . etumbu ya Seko, kútu, lipamboli ya Seko mpe ezalaka te. Soki mói ezalaka te, butu mpe ezalaka te. Bomoni? Kasi kaka

ndenge mói ezali, butu mpe ezali. Kaka—kaka ndenge—ndenge Moklisto azali, moto na bilongi mibale mpe asengeli kozala. Kaka ndenge ezali na moto ya solosolo oyo auti na Nzambe, ezali na moto moko oyo akomekola yango. Bomoni? Ezalaka kaka bongo, malamumu ná mabe, moindo ná mpembe, ekóbaka bongo na bomoi mobimba, na makambo nyonso, sólo ná lokuta na bisika nyonso. Mpe nsango-malamumu ya lokuta ezalaka, Nsango-malamumu ya solo mpe ezalaka. Libatisi ya solo ezalaka, libatisi ya lokuta mpe ezalaka. Mondimi ya maloba azalaka, oyo ya solosolo mpe azalaka. Dollar Americain ya solo ezalaka, dollar Americain ya lokuta mpe ezalaka. Moklisto ya solosolo azalaka, moto na bilongi mibale ya solosolo mpe azalaka, bomoni, oyo azalaka kaka komekola. Boye, bomonaka yango, boye, nyonso etambolaka elongo. Sikoyo, tokoki kokabola yango te. Nzambe nde asalaka ete mbula ébeta.

⁴⁵ Tika ete Ápesa ngai nzela ya koloba mwa moke awa. Batei boni bazali awa? Bótombola maboko. Bisika nyonso, batei, bótombola maboko. Ee, Nzambe ápambola bino, bandeko. Sikoyo, sikoyo, bózua likambo oyo lokola mateyo te, sikoyo, kasi, liboso ete tóbanda liteya ya motuya oyo, nakoyebisa bino nini yango. Ba-Pantekotiste boni bazali awa? Bótombola maboko, batondi na bisika nyonso. Ee, bino nyonso bozali ba-Pantekotiste. Malamumu. Nakoyebisa bino likambo oyo ekómelaki ngai ntango nayaki na ngámbo na molongo na bino.

Nazalaki awa, na Indiana, na esika moko boye, nkombo na yango Mishawaka. Etóngá ya liboso ya bato ya ba-Pantekotiste oyo natikálá komona, nkombo na yango ezalaki ba—ba-Assemblée Pantekotiste ya Yesu Klisto, nabanzi, to eloko moko ya ndenge wana, etóngá ya bato malamumu mpenza. Sikoyo basangáná, bamisálelé ebongiseli, babengaka bango ba-Pantekotiste Basangani. Bakabwanaki ná baoyo batikali, mpo na likambo ya libatisi na máí. Yango ekómisi bango bato na bilongi mibale te. Baklisto ya solosolo, oyo babotami mbala ya mibale na Molimo Mosanto ya solosolo, bazali ebele na kati na bango. Mpe Nzambe apesá bango Molimo Mosanto, ndenge babatisamaki na “Nkombo na Yesu,” mpe apesi bamosusu libatisi ya Molimo Mosanto, ndenge babatisamaki na “Tata, Mwana, Molimo Mosanto.” Boye, “Nzambe apesaka bango Molimo Mosanto, baoyo batosaka Ye,” boye, baoyo—baoyo bazuaki, ezali baoyo batosaki Ye? Yango mpenza.

⁴⁶ Soki bokoki kaka kobosana, mpe baoyo balingi kozala na lolenge moko boye, bótika bango, kasi bino bókende liboso mpe bózala bandeko. Esili. Bino. . . Oyo esalaki yango, ezalaki kokabola bango, kokabwana. Bomoni? Nini? Ezalaki kobuka, kokata, kokabola bondeko, kopanza mpe kokabwana bino na bino. Te, misie, tokabwani te, tozali moko. Ya solo.

⁴⁷ Kasi ntango natelemaki kuna, nazalaki kotala bato yango malamumu. Sikoyo, ngai, nautaki kobima na lingomba moko boye

ya moke, ya ba-Batiste ya Súdi, ee, nazalaki komona bato yango, nakotaki kuna mpe bazalaki kobeta maboko, kogánga: “Moko na bango, moko na bango, nazali na esengo ya koloba ete nazali moko na bango!”

⁴⁸ Namilobelaki: “Oh! Fiuu!” Na mbala moko, moto moko ayaki wana, azobínáká na makasi na ye nyonso. “Ttt-ttt-ttt-ttt-ttt,” namilobelaki, “ezaleli ya boye na kati ya losambo! Natikálá koyóka makambo ya boye te.” Nazalaki kaka kotala bango malamumu, bipai na bipai. Namitunaki: “Ee, likambo nini mpenza ekómeli bato yango?”

⁴⁹ Sikoyo, bosílá koyoka ngai kobeta lisolo ya bomoi na ngai, ntango nakómaki na liyangani yango, kuna. Kasi oyo ezali moko na makambo oyo natikálá koloba te, natikálá koloba yango liboso te, liboso ya bato. Boye bango. . . Sikoyo, soki bolingi kolongola yango na bande na bino, ee, bokoki kosala yango. Malamumu. Sikoyo, na yango, nazalaki kotala malamumu, mpe, sikoyo, namilobelaki: “Ee, bato yango bazali bato ya esengo koleka, oyo namóná na bomoi na ngai.” Bazalaki koyoka losambo na bango nsóni te. Biso ba-Batiste toyokaka mwa nsóni, mbala na mbala, boyebi. Bomoni? Mpe soki babandi kosambela, boyebi, bakendeke na nsima ya ventilatére, boyebi. Mpe—mpe, kasi biso. . . Kasi bato wana te, ndeko, bango—bango bazalaki na kosambela ná kati, ná libanda nyonso, mpe na nzoto na bango mobimba.

⁵⁰ Ee, nazoyeba lisusu na mpokwa wana ntango namataki na etumbelo. Balobaki: “Batei nyonso bámata na etumbelo.” Ezalaki likita. Basengelaki kosala yango awa na Nordi, mpo na—mpo na likambo ya bokabwani ya lángi ya loposo, mpo na mobeko ya Jim Crow na Súdi. Boye, bango nyonso bakutanaki kuna longwa bipai na bipai. Boye, nafandaki na etumbelo. Mpe alobaki. . . Ee, sikoyo, ezali na. . . Nayokaki batei nyonso na mói mobimba ná butu wana. Babengaki mobange motei moko, mobange moto moindo moko ayaki wana, atikalaki kaka na mwa nsuki moke ezingá motó na ye, ndenge *wana*, alataki kazaka ya batei, ya molai, oyo ezalaka na mokíla, boyebi, ná kingo ya velours, na eleko ya molunge. Mobola mobange yango ayaki wana *boye*. Alobaki: “Balingami bana na ngai,” alobaki, “nalingi koyebisa bino,” abandaki kotatola. Nazalaki elenge koleka bato nyonso oyo bafandaki na etumbelo. Boye, alobaki: “Nalobi na bino!” Azuaki motó ya liteya na ye na Yobo: “Ozalaki wapi ntango Natiaki mibóko ya mokili? Yebisa Ngai soki mibóko na yango epikami na nini.”

⁵¹ Batei mosusu nyonso oyo bazalaki koteya na ntina na Klisto, bo momesano. Nayokaki bango, nasepelaki na bango. Kasi mobange wana te! Ye azongaki nsima, na mibu pene na nkóto zomi, liboso ete mokili étikala kobanda. Amataki na Likoló mpe akitaki, alekaki mbala moko na mipepe, makambo oyo ezalaki kosalema. Bango bazalaki koteya makambo oyo esalemaka na

nsé na mói; ye azalaki koteya makambo oyo ezalaki kosalema na Likoló. Amemaki lisusu Klisto likoló ya monama oyo elálá, kuna na nsima na esika moko boye, kati na Seko-na-seko. Ee, azalaki koteya naino miníti mitano te, mobange yango, Eloko moko ekangaki ye. Apumbwaki mpe atutisaki matíndí na ye, mpe agangaki: “Yúupii!” Azalaki na esika ya monene lokola oyo nazali na yango awa. Alobaki: “Bozali na esika ya kokoka te mpo ngai náteya,” mpe akendeki na ye.

⁵² Ee, namilobelaki: “Soki yango ekosala bongo na mobali ya mibu pene na ntuku mwambe, yango ekosala nini epai ngai? Yango nde eloko oyo nalingi. Yango nde eloko oyo nalingi.”

⁵³ Kasi eloko etungisaki ngai ezali boye. Sikoyo, tozali kolobela milimo mabe sikoyo. Eloko etungisaki ngai, nazalaki kotala malamau mibali mibale. Moko afandaki na ngámbo moko, mpe moko na ngámbo mosusu. Mpe ntango Molimo ezalaki kokita, mibali yango bakotelema, koloba minoko na sika, kogánga, mpe kokóma mpembe zinga-zinga ya monoko. Namilobelaki: “Oh la la! soki nakokaki kaka kozala na yango!” Bomoni? “Kitoko mingi! Oh, ezali. . . nalingaka yango mingi!” Ee, nakendeki na elanga ya masangu. Nabetelaki bino lisolo ya bomoi na ngai. Botángaki yango na buku. Nalalaki butu mobimba. Nazongaki na ntongo oyo elandaki, boye, nakanisaki ete námeke likambo yango. Nazalaka na lolenge moko ya kosala makambo, oyo moto moko te ayebi, kaka Nzambe ná ngai. Boye, ezali ete, nalobaka maloba moko, mpe nakokende kokutana na molimo ya moto yango. Bomonaka yango awa na etumbelo. Bomoni? Na bongo nabandaki kosolola na moko na mibali yango. Namonaki bango, bafandaki pene elongo, mpe bazalaki kosimbana na maboko, kobina mpe kogánga. Namilobelaki: “Oh! la la! ezali koyokana lokola eloko ya solosolo mpo na ngai!”

⁵⁴ Mpe nasimbaki moko na maboko na ye. Nalobaki: “Mbote, misie?”

⁵⁵ Alobaki: “Mbote.” Moto malamau mpenza, lolenge ya mobali malamau. Alobaki. . .

Nalobaki: “Ozali motei?”

Alobaki: “Te, misie. Nazali kaka mondimi.”

⁵⁶ Mpe nakobaki na mwa lisolo ná ye mwa moke mpo nákoka kokutana ná molimo na ye. Bomoni? Ye ayebaki yango te. Moto moko te ayebaki yango. Natikálá koloba eloko moko te na ntina na yango. Mibu ebele elekaki, liboso nálobela yango. Boye, bango. . . Kasi ntango nayaki komona yango, eyokanaki solo mpenza, ebongaki mpenza be, azalaki Moklisto! Mobali yango azalaki mpenza mosanto ya Nzambe. Namilobelaki: “Ndeko, ezali malamau.”

⁵⁷ Kasi ngámbo ya kokamwa, ntango nakutanaki na mobali mosusu wana, ezalaki ndenge mosusu. Azalaki kutu kobika elongo ná mwasi moko, oyo azalaki mwasi na ye te. Ya solo.

Mpe namonaki yango kopusana pembeni na ye, emononeli. Namilobelaki: “Oh la la! ekoki kozala bongo te.” Mpe mobali yango. . . Namilobelaki: “Sikoyo, sikoyo, molimo katikati na bato yango ezali mabe. Nde nyonso oyo yango ezali.”

⁵⁸ Boye, na mpokwa wana, ntango li. . . nakendeki na liyangani, mpe mapamboli ezalaki kokita, nazalaki kobondela Nzambe, mpe Molimo Mosanto, Mwanje ya Nkolo atalolaki ete ezalaki mpenza Molimo Mosanto. Molimo moko oyo ezalaki kokita likoló na mobali *oyo*, ezalaki kokita likoló na mobali oyo *kuna*. Mpe ntango Molimo ezalaki kokita, bango nyonso mibale bazalaki kotelema, mpe bango mibale bazalaki kogánga, kogánga makasi, mpe kokumisa Nkolo, bazalaki koloba minoka na sika mpe kobina. Nalobaki: “Na—na—nazokoka kososola yango te, Nkolo. Bi. . . nazokoka komona yango kati na Biblia te, epai wapi yango ekokaki kozala solo.” Sikoyo, nalobaki: “Ntango mosusu napengwisami.” Bomoni? Nalobaki. . . Sikoyo, tala, na—nakoki te. . . Naza—nazalaka moto ya kokangama kaka na oyo Bible elobi. Esengeli kozala Oyo. Bomoni? Nalobaki: “Nkolo, Oyebi lolenge na ngai, mpe na—nasengeli komona yango kati na Liloba na Yo. Mpe na—nazokoka kososola te. Ntango Molimo Mosanto ezali kokita likoló na mobali *oyo*, Molimo Mosanto ezali mpe kokita likoló na mobali oyo *kuna*, mpe moko na bango azali mosanto, mpe mosusu azali moto na bilongi mibale. Mpe nayebi ete ezali bongo.” Nayebi yango. Kozanga. . . Nakokaki komema mobali yango pembeni mpo natalisa ye yango polele, to kobenga ye pembeni mpe koyebisa ye na ntina na yango.

⁵⁹ Lokola nakokaki kosala yango epai ya mobali oyo afandaki awa lobi na mpokwa, oyo azalaki bobele mo—mokosi, soki mpenza moko akoki kozala, afandi wana. Mpe nasengelaki koloba yango polele, kasi alingaki kotelema mpe kobanda mindondo. Na bongo, natikaki yango kaka, mpo na kobatela liyangani, kasi nayebaki ye. Iyo, misie.

Ezalaki na moko, mibale na bango, bafandaki kuna, na sima, na mpokwa mosusu wana, basambelaka na lingomba moko boye awa, na engumba oyo. Batóngi ya solosolo! Namonaki bango. Kasi, soki osali yango, akobanda kaka mindondo. Nasálá yango mbala mingi. Natikaka bango bongo, bomoni. Likambo te. Nzambe ayebi, Ye nde Mosambisi. Bótika bango bábenga ngai mbala moko, na bongo bokomona likambo moko kosalema, bomoni, bótika ye ásala yango.

Ndakisa molimo mabe, natikálá kobenga molimo mabe yango te. Ye nde ayaki epai na ngai mpe abetaki na ngai móndengé. Na ntango yango nde Nzambe akotaki na mosala, bomoni, ya solo, mpe bomonaki likambo oyo esalemaki. Malamu. Kasi natikaki kaka likambo yango. Esalaki ete liyangani ékóma matata, mpo molimo yango ezalaki ntango nyonso kobundisa ngai, bomoni. Boye nakobaki kaka kokende liboso.

⁶⁰ Kasi sikoyo, mibali yango, nazalaki kokoka kososola yango te. Mpe elekaki mibu mibale, to misato, ntango nazalaki na Green's Mill, na Indiana, awa, na zamba ya ba-scouts. Nazalaki na kati ya libulu moko ya kala, esika nakendeke kobondela. Mpe kuna, nalobaki: "Nkolo, nazokoka kososola te eloko nini ekómelá etónga ya bato wana te. Bato ya malamú koleka oyo natikálá kokutana na bango na bomoi na ngai, kasi na—nazokoka kososola te ndenge nini likambo wana ekokaki kozala molimo mabe. Ntango ezali. . . soki, na bongo. . . Oyebe bosembo ya motema na ngai. Oyebe ndenge nalingaka Yo mpe ndenge nasalelaka Yo. Kaka Molimo moko oyo ezali awa, ná ngai ezalaki likoló na bato yango. Mpe tala ezalaki likoló na mobali wana, kuna, kaka ndenge moko." Boye, nazalaki kokoka kososola te.

⁶¹ Mpe Nkolo akitaki na mawa na Ye mpe alakisaki ngai yango. Tala esika yango ezalaki. Esengeli kokokana na Makomi, liboso. Alobaki: "Zua Biblia na yo." Mpe nazuaki Biblia na ngai. Nabanzi ete nasimbaki Biblia yango mpo na miníti zomi, kozanga moto moko. . . Liloba mosusu élobama. Nazalaki kaka mwa ngonga moke. Nayokaki Ye koloba lisusu: "Zua Baebele 6 mpe banda kotánga." Mpe nasalaki yango. Mpe ntango ekómaki na nsé wana, esika Elobaki: "Mbula oyo ekonokaka na mabelé mpo na komwangila yango mái mpe kobongisa yango, kolengela yango mpo na oyo e. . . kasi nzube mpe matiti, oyo ebelemi mpo na kobwakama, oyo nsuka na yango, esengeli kozika móto." Mpe nasosolaki yango wana mpenza.

Namilobelaki: "Yango wana mpenza. Matondi epai na Nzambe! Yango wana mpenza." Bomoni?

⁶² Sikoyo, Yesu alobaki: "Molóni moko akendeke kolóna mbuma," Alobaki bongo te? Sikoyo, bino nyonso awa bozali Baklisto. Bato nyonso batombolaki maboko, ata bongo, ba-Pantekotiste, Baklisto babótámá mbala mibale. Malamú. Bango. . . Mpe Alobaki: "Molóni moko akendeke kolóna mimboto. Mpe ntango alalaki. . ." kopema, kokufa na Ye, na katikati wana. Bomoni? "Mpe ntango alalaki, monguna moko ayaki kolóna matiti mabe na elanga yango." Matiti mabe ezali nini? Matiti ya mabe, nzube mpe nyonso wana. Sikoyo, "Ntango mosali-elanga (motei) amonaki matiti mabe yango kokóla, alobaki: 'Pesa ngai nzela ya kokende kopikola yango.' Alobaki: 'Te, te. Likámá ezali ete ópikola mpe blé. Tika nyonso mibale ékóla elongo.'"

⁶³ Elanga ya blé ezali awa. Ezali na matiti ekolaka na kobendana, nzube, matiti ya solo mabe, mpe nyonso mosusu na kati na yango. Boye te? Kasi, sikoyo, na kati wana, blé mpe ezali. Sikoyo, mbula enokaka likoló na mabelé, mpo na komwangisela yango mái. Sikoyo, mbula, ntina na yango nini? Ezali mpo na komwangisela nzube mái te. Sikoyo bótala malamú mpe bóyoka na bokébi. Ezali te mpo na komwangisa mái na matiti ekolaka na kobendana. Mbula etindamaka mpo na blé, kasi nzube ná matiti

mabe ezalaka mpe na mposa ya mái lokola blé. Mpe mbula moko oyo ekweyaka likoló na blé, ekweyaka mpe likoló na matiti mabe. Mpe mwa matiti mabe ekotelema semba ndenge wana, ekosepela mpe ekotonda na esengo, kaka ndenge mwa blé ekotelema mpe ekosémbwama yango moko.

⁶⁴ “Kasi na mbuma na bango nde bokoyeba bango.” Yango wana mpenza. Bomoni? Sikoyo, Molimo Mosanto moko oyo, ekoki kopambola moto na bilongi mibale. Yango ekweisaka ba-Arminien mosusu kati na bino, kasi ezali Solo. Ezali Solo. Boteyámá bosantu, ngai mpe nandimelaka bosantu. Kasi Molimo moko yango, mbula ekitaka likoló na bato malamú ná bato mabe, kasi na mbuma na bango, bokoyeba bango.

⁶⁵ Soki natali awa mpe nakei kobuka mbuma ya blé, nakozua mbuma ya blé, kasi matiti mabe mpe ekangami mobimba ná yango. Mpe babikaka na mbula yango moko oyo ekweyaki mpo na blé. Mbula etindamaki mpo na matiti mabe te, etindamaki nde mpo na Blé. Kasi lokola mbula ezali na elanga, lokola blé ezali. . . lokola matiti mabe ezali na elanga ya blé, yango mpe ezuaka litómba ya mbula yango, lokola yango nyonso oyo etikali. Mpe mbula moko oyo esalaki ete blé ézala na bomoi, yango nde esalaki ete matiti mabe ézala na bomoi.

⁶⁶ Makambo nyonso na mokili etalisaka oyo ya molimo, ndenge tolakisamaka na yango. Yango mpenza, boyekoli milimo mabe, komekoláká Boklisto, ata bongo ezali ná lipamboli. Oyo wana ezali miliki ya ba-bebé te, bandeko, soki bokoki komela yango. Bomoni? Bomoni? Sikoyo, ezali—ezali Solo.

⁶⁷ Boye nabikisami lelo te mpo nakoki kogánga. Nabikisami te mpo namiyokaka lokola ete nabikisami. Nabikisami mpo nakokisi maséngisi ya Nzambe kati na Biblia oyo. Yesu alobaki: “Ye oyo akoyoka Maloba ma Ngai mpe akondima Ye oyo atindi Ngai, azali na Bomoi ya seko, mpe akoleka na kosambisama te, kasi asili koleka longwa na kufa, kino na Bomoi.” Ngai nandimaka yango. Ya solo. Mpe na oyo etali maséngisi yango, ngai nabikisami, mpo Nzambe alobaki bongo.

⁶⁸ Soki ayebisaki ngai ete obikisami mpo moto moko alobaki: “Mopepe makasi ebetaki ngai na elongi,” ezali kitoko mingi, kasi nakolinga koyeba epai wapi mopepe makasi yango eutaki, liboso ébeta ngai na elongi, bomoni. Sikoyo, bomoi ya ndenge nini okobika nsima na mopepe makasi wana esili kobeta yo? Bomoni? Bomoni, bakoyeba yo nde na mbuma na yo. Boye, milimo mabe ekoki kosala katikati na Baklisto. Bondimi yango? Bótala Polo, Polo alobaki. . .

⁶⁹ Sikoyo, awa nde esika oyo bato ya Mbula ya Ntango ya Nsuka. . . Soki moko na bino azali awa, bólimbisa ngai soki nalobi likambo moko ya kotelemela bino. Nakolinga te koloba likambo moko ya kotelemela bino, kaka ndenge nakolinga mpe te kosala yango na bato ya ba-Assemblée, to banani, ba-Batiste,

to banani mosusu. Ezali Solo oyo ezali Solo. Esika bobimaki na nzela, ezalaki likambo oyo: bozali kokómisa bato yango basakoli mpe nyonso, ná baoyo bazali basakoli te. Basakoli, “batielaka bango maboko” te mpo na kotinda bango. Basakoli babotamaka bongo. Bomoni? Na Biblia, *likabo* ya lisakoli ezali. Na esika wana nde libunga na bino ezalaki, kosala bokeseni kati na likabo ya lisakoli ná mosakoli. Likabo . . .

⁷⁰ “Nzambe, na ntango ya kala mpe na nzela ndenge na ndenge, asololaki na batata na biso na nzela na basakoli, na mikolo oyo na nsuka, na nzela na Mwana na Ye, Yesu Klisto.” Mpe Nzoto ya Klisto ezali na makabo ya molimo libwa, oyo esalaka na kati na yango. Mpe ekoki kozala likoló na mwasi *oyo* na mpokwa oyo, lisakoli yango, ntango mosusu ekotikalaka kozala lisusu te na bomoi na ye oyo etikali. Ekoki kozala likoló na mwasi *oyo* na mpokwa oyo elandi. Ekoki kozala likoló na mobali *oyo* na mbala ekolanda. Ekoki kozala likoló na mobali *wana* kuna na nsima, na mbala ekolanda. Yango ekómisi mwasi yango mosakoli te, ekómisaka moto moko te mosakoli. Ezali likabo ya lisakoli na kati na yo.

⁷¹ Mpe liboso ete mobali yango to lisakoli yango épesama na losambo, esengeli kosambisama na basambisi ya molimo mibale to misato. Ezali solo? Kokokana na, sikoyo, Polo alobaki: “Bino nyonso bokoki kosakola, moko na moko.” Soki likambo moko emonisami epai ya moto *oyo*, tika ete oyo *kuna* áfanda kimia. Ee, wana ekokomisa etónge yango mobimba basakoli, kokokana na malakisi ya lelo. Te, lingomba Pantekotiste, tosili kobúlunganisa makambo nyonso. Mpe yango nde ntina oyo Nzambe akoki kokóta te, kino tokosembola makambo nyonso, kokokana na Biblia. Ezali solo. Bosengeli kolanda nzela oyo esengeli. Ndenge nini okoki kotonga ndako kozanga kotala mwango? Bomoni? Osengeli kobanda malamau.

⁷² Sikoyo, na kati kuna, mosakoli, botikala komona moto moko te kotelema liboso na Yisaya, na Mose. Moko atelemaki liboso na ye, mokolo moko, Koré, mpe amekaki kotelemela ye, mpe Nzambe alobaki: “Kabwana na bango, Nakofungola mabelé mpe . . .” Mosakoli abotamaka mosakoli. “Makabo mpe kobengama . . .-zanga kobongola motema.” Yango ezali kobongisama liboso na Nzambe, banda bobebé komata. Nyonso ezalaki malamau be ntango nyonso, makambo oyo azalaki koloba ezalaki mpenza solo, etatolamaki mpe ekokisamaki. Ezali Liloba na Nzambe, eyaka epai na mosakoli. Kasi likabo ya lisakoli ezalaka na kati ya lingomba.

⁷³ Sikoyo, okoloba: “Ee, basakoli batali nde Kondimana ya Kala.” Oh te! Kondimana ya sika mpe ezalaki na basakoli.

⁷⁴ Agabus azalaki mo—mosakoli ya Kondimana ya sika. Bótala Molimo ya lisakoli yango kokita kuna mpe kolobela Polo likambo yango. Na sima, tala Agabus ayaki longwa na

Yelusaleme, amonaki Polo, amikangaki na mokába na ye, abalukaki mpe alobaki: “YANGO ELOBI NKOLO, moto oyo alataki mokába oyo akokangama na minyolólo ntango akokóma na Yelusaleme.” Agabus, oyo atelemaki mpe alobaki, alobaki liboso likambo oyo ekosalema, ye azalaki mosakoli, azalaki te moto oyo azalaki na likabo ya lisakoli.

⁷⁵ Mpe likabo ya kobikisa babeli ná makabo nyonso wana, moninga na ngai Pantekotiste, bobúlunganisi nyonso. Makabo ezali kati na lingomba, ezali mpo na bato nyonso oyo bazali na kati ya lingomba, moto nyonso oyo abatisami na kati ya Nzoto. “Na Molimo moko, biso nyonso tobatisami na kati.” Mpe Biblia elobi. . .

“Ee, ngai nazali na likabo ya kobikisa babeli.”

⁷⁶ Ee, Biblia elobi: “Bóyambolaka mabe na bino bamoko na bamosusu, mpe bóbondela bamoko mpo na bamosusu.” Moto nyonso ábondelaka bamoko mpo na bamosusu. Tozali etónga oyo ekabwani te; tozali etónga esangani elongo, eyangani. Bomoni?

Sikoyo, mpe lolenge wana nde, mbala mingi, milimo mabe esalaka.

⁷⁷ Sikoyo bóyoka malamumu likambo oyo Polo alobaki: “Soki moko alobi minoko na sika mpe mosusu alimboli yango, mpe oyo nyonso ye alobi, tika ete ésambisama liboso, yambo ete lingomba ékoka koyamba yango.”

⁷⁸ Sikoyo, ekozala te kozongela kotanga Likomi, to eloko moko to mosusu ya ndenge wana. Nzambe azongelaka-zongelaka maloba na Ye moko te. Kasi ekozala likebisi mpo na lingomba. Na bongo, soki basámbisi ya malamumu balobi: “Tóyamba yango.” Malamumu, euti na Nkolo. Moto ya mibale alobi: “Tóyamba yango.” “Na monoko ya batatoli mibale to misato, tika ete liloba nyonso ékatama.” Na bongo, lingomba eyambi yango mpe ebandi komilengela mpo na yango. Soki likambo yango ekokisami te, likambo oyo yango elobaki, boye bozali na molimo moko mabe na kati na bino. Ya solo. Kasi soki ekokisami, na bongo bótonda Nzambe, Molimo na Nzambe ezali kati na bino. Bomoni? Sikoyo, na esika wana nde bosengeli kotala malamumu mpe kokéba. Boye, bóluka kosala na makasi te. Nakokoka kosala ngai moko te ete náková na miso ya mwa moindo, na ntango nazali na oyo ya bléu, bomoni, nasengeli kosepela na miso ya bléu. Sikoyo, esika wana nde milimo mabe esalaka, na ngámbo ya bato ya molimo.

⁷⁹ Sikoyo eloko moko ya bozindo ezali koya sikoyo, mpe nazolikya ete ezali bozindo mingi te. Sikoyo, na Samwele ya Liboso 28, nalingi kotánga Likomi moko awa, na ngonga oyo. Nalingi ete bóyoka na bokebi nyonso. Mpe nalingi koteya likoló na “milimo mabe,” kolakisa bino ndenge basálaka mpenza makambo na kati ya lingomba, mpe ndenge Satana azalaka na eloko ya lokuta mpo na eloko nyonso ya solo, oyo ezalaka. Sikoyo,

bokoki komona, kokokana na Biblia, ete milimo mabe eyáka katikati na Baklisto mpe emekolaka.

⁸⁰ Mpe mbala mingi, tolobá ete bato bazali Baklisto ntango balobaki: “Nandimeli Yesu Klisto.” Ee, milimo mabe mpe endimaka likambo yango moko, mpe eléngaka. Wana ezali elembeteli te ete osili kobikisama. Moko na bampokwa oyo, nalingi kolobela boponami, na bongo bokomona oyo lobiko elingi koloba. Bomoni? Ezali eloko moko te oyo yo osengelaki kosala, na ebandali, to na nsuka, to eloko moko te oyo okoki kosala na ntina na yango. Nzambe abikisaka moto, na esengisi moko te. Moninga, ekoti mpenza na bozindo, boye te? Sikoyo, ekozala mpenza malamau ete óbimisa yango na mimesano na yo, wana tozali kolobela yango. Malamau.

⁸¹ Abraham azalaki ebandeli ya kondima na biso. Boye te? Oh, Abraham azalaki na elaka. Mpe Nzambe abengaki Abraham mpo azalaki moto monene, nabanzi? Te misie. Autaki na Babilone, na—na etúka ya Kalade, na engumba ya Ulu, mpe Nzambe abengaki ye mpe asalaki boyokani na Ye elongo ná ye, na eséngisi moko te. “Nakobikisa yo. Mpe bobele yo te, Abraham, kasi Momboto na yo,” na eséngisi moko te.

⁸² Nzambe asalaki boyokani moko ná moto, kasi moto abúkaka boyokani na ye, ntango nyonso. Moto atikálá kobatela boyokani na ye ná Nzambe te (Mobeko etikálá kotosama te; bazalaki kokoka kotósa mobeko te; Klisto ayaki mpe abukaki mobeko, Ye moko.) mpamba te ngolu esilaki kopesa mobikisi moko, Mose, ebongisaki nzela ya kokimela, na bongo, nzela ya kokimela, kútu, na bongo bato, nsima na yango, bazalaki kaka na mposa ya eloko moko ya kosala. Moto alukaka kosala ntango nyonso likambo moko mpo na komibikisa, na ntango oyo okokoka kosala yango te. Ezali lolenge na ye. Kaka ngonga oyo amonaki ete atikalaki bolumbu, na elanga ya Edene, asalaki mikába na nkasa ya mowiti. Ezali solo? Kasi amonaki ete esimbaki te. Eloko moko te oyo moto akoki kosala ekoki kobikisa ye moko. Nzambe nde abikisaka moto, na esengisi moko te, na kati na bileko nyonso. Na bongo, na ntango obikisami, obikisami.

⁸³ Bótala Abraham. Mobali yango azalaki kuna, akendeki kuna, mpe Nzambe apesaki ye mboka ya Palestine mpe ayebisaki ye ete álongwa wana te. Moyuda nyonso oyo azalaki kolongwa na Palestine azalaki mozóngi-nsima. Nzambe alobaki na ye ete átikala wana. Soki Nzambe ayebisi yo ete ósala likambo moko to mosusu, mpe osali yango te, na boye ozali mozóngi-sima. Ezali solo? Malamau, bokauki eyaki, mpo na komeka kondima ya Abraham. Mpe na esika ete Abraham átikala wana, te, akokaki kotikala wana te, akimaki, azuaki Sara mpe bakendeki na ntáka ya kilometre pene na nkama mitano (elingaki kozala malamau soki nزالaki na ntango mpo na kolobela yango) kino na mboka mosusu.

84 Mpe ntango akómaki kuna, bongo akutanaki na mokonzi monene oyo kuna, Abimeleke. Azalaki elenge mobali mpe azalaki koluka elenge mwasi moko, boye amonaki mwasi ya Abraham, Sara, mpe alingaki ye. Mpe Abraham alobaki: “Sikoyo, yebisa ye ete ozali ndeko na ngai ya mwasi, mpe ngai nazali ndeko na yo ya mobali.”

85 Boye, yango esepelisaki Abimeleke, boye alobaki: “Malamu, tokomema ye na ndako ya mokonzi.” Mpe nakanisi ete basi yango babongisaki ye kitoko, mpe alingaki kobala ye, na mokolo oyo ekolanda.

86 Mpe Abimeleke azalaki moto moko malamumu, moto na boyengebene. Mpe na butu wana, wana azalaki kolala, Nkolo amonanaki na ye mpe alobaki: “Okesani te na moto oyo asili kokufa.” Alobaki: “Mobali yango. . . Mwasi oyo ozali na ye kuna, mpo na kobala ye, azali mwasi ya moto mosusu.” Sikoyo bótala malamumu. “Mwasi ya moto mosusu.”

87 Ee, alobaki: “Nkolo, Oyebi bosembo ya motema na ngai,” moyengebene, mosantu. “Oyebi bosembo ya motema na ngai. Mobali wana ayebisaki ngai ete azali ‘ndeko’ na ye ya mwasi. Ye moko mwasi ayebisaki ngai te ete oyo wana azali ‘ndeko na ngai ya mobali?’”

88 Alobaki, Nzambe alobaki: “Nayebi bosembo ya motema na yo, yango wana Nabateli yo mpo ósala lisumu liboso na Ngai te. Kasi oyo wana azali mosakoli na Ngai!” Aleluya!

89 Azalaki nini? Mozóngi-nsima, mpe mwa mokósi moko boye. Boye te? Oh, te, mwa lokuta ya pembe ezalaka te. To ezali lokuta ya moindo, to ezali na yango lokuta ata moke te. Mobali yango afandaki kuna, abukaki mpenza lokuta, ntango alobaki ete oyo wana azalaki “ndeko” na ye ya mwasi, na ntango azalaki nde mwasi na ye, azalaki kobeta-beta monoko, mpe akómaki mozóngi-nsima.

90 Mpe tala moyengebene moko azalaki wana, liboso na Nzambe, mpe alobaki: “Nkolo, Oyebi motema na ngai.”

91 “Kasi Nakoyoka libondeli na yo te, Abimeleke, kasi zóngisela ye. . . zóngisa mwasi yango mpe tika ete ye ábondela mpo na yo. Azali mosakoli na Ngai; Nakoyoka ye.” Iyo, mozóngi-nsima, mokosi, kasi: “Azali mosakoli na Ngai.” Ezali Solo? Ezali Biblia.

92 Sikoyo, bókende na yango mosika mingi te, na ngámbo ya ba-Calviniste: “Soki okoti na ngolu, otikali libela na ngolu,” mpo okoya kokóta na nsóni. Bomoni? Sikoyo, bózela moke, tokozua ntango, na mpóso oyo, ya kolobela yango mpo na kotalisa bino mosanda oyo yango ezali. Kasi kokanisaka te, lokola osalaki likambo moko ya mabe, ete obungi libela. Ozali mwana na Nzambe, obótámá na Molimo ya Nzambe, bozali bana-mibali mpe bana-basi ya Nzambe, mpe mbuma yango moko ekotatola na ntina na yango. Yango mpenza.

⁹³ Sikoyo, tala biso oyo, na kati ya mboka yango. Sikoyo, nalingi kotánga awa, molongo ya 6.

Mpe etunaki Saulo epai na Yawe, Yawe azongiselaki ye te, to na lilóto te, to na Ulime te, to na mosakoli te.

mpe Saulo alobaki na basali na ye ete: Bólukela ngai mwasi moko oyo ajali mosololi na milimo, ete nakende epai na ye, mpe natuna ye.

Nakokaki kobeta eloko moko awa, mpo na mwa...
 “Bólukela ngai mwasi moko oyo azali mosololi na milimo.”

. . . Mpe mosali na ye alobaki na ye: Tala, mwasi moko oyo ajali mosololi na milimo afandi na Ene-dore.

Mpe Saulo abongolaki lolenge na ye mpe alataki bilamba, bilamba mosusu, mpe akendeki, mibale. . . ná bato mibale elongo na ye, mpe bakómaki epai na mwasi yango na butu: mpe bango balobaki, nalombi yo, . . .-bisa ngai, likambo na njela na molimo na yo, mpe komisela ngai. . . moto oyo nakotanga ye nkombo.

Mpe mwasi yango alobaki na ye ete, Tala, oyebi oyo ete Saulo asili kosala, ayebi mpenza, asili kolongol na mboka bato nyonso oyo basololaka na milimo mpe. . . banganga-nkisi: yango wana. . . mpo na nini ozali kokweisa ngai na motambo, mpo báboma ngai?

Mpe Saulo ayanolaki, alapaki ndai na nkombo ya Yawe, alobaki: Lokola Yawe azali na bomoi, nalobi na yo ete etumbu ekopesamela yo mpo na likambo oyo te. . .

Mpe mwasi yango alobaki: Nábimisela yo. . . nani? Mpe alobaki: Bimisela ngai Samwele.

Mpe ntango mwasi yango amonaki Samwele, agangaki na mongongo makasi: mpe mwasi yango alobaki na Saulo ete: Mpo na nini ojimbisi ngai? mpo ete yo ozali Saulo.

Mpe mokonzi alobaki na ye: Kobanga te: kasi omoni nini? Mpe mwasi yango alobaki Ngai. . . na Saulo ete: Namoni banzambe azali kobima na mabelé.

Mpe alobaki na ye: azalaki lolenge Nini? Mpe alobaki: Mobange azali koya; mpe azipami na emba monene. Mpe Sam- . . . (Na ntembe te, ezalaki kazaka ya mosakoli. Bomoni?) . . . asosolaki ete ezalaki Samwele, mpe atelemaki na . . . mpe akomisaki elongi na mabele mpe akumbamaki.

Mpe Samwele alobaki na Saulo ete, Mpo na nini otungisi kopema na ngai mpe óbimisi ngai? Mpe Saulo ayanolaki, mpe alobaki, ete, Nabangi mingi; mpo Bafilistia bazali kobunda na ngai, mpe Nzambe asili kolongwa na ngai, mpe azali lisusu koyanola ngai te,

ézala na mosakoli te, to na liloto te: boye ngai... nabiangi yo ete óyebisa ngai nini yango esengeli na ngai kosala.

Mpe Samwele alobaki ete, Mpo na nini...ozali kotuna...ngai, wana omoni ete YAWE alongwi na yo mpe—mpe akómi moyini na yo?

Mpe YAWE asili kosala epai na ye, lokola elobaki ye epai na ngai: mpo YAWE asili kopasola bokonzi na ye longwa na loboko na yo, mpe asili kopesa yango ata epai na... Davidi:

⁹⁴ Sikoyo, bato mingi kati na bino boyebi likambo oyo. Sikoyo tolingi kobanda yango mbala moko, mpe tika ete Nzambe ázunga biso sikoyo, mpo na mwa ntango, mpo tókóta na likambo oyo. Sikoyo bótala malamú. Ezalaki na moto moko, Saulo, oyo na ntango moko azuamaki lokola mosakoli, mpo asakolaki elongo ná basakoli. Ezali solo, balakisi? Sikoyo, awa moto yango azongaki nsima. Ezali solo? Kasi bóbosana te esika oyo Samwele alobaki ete akozala, elongo ná ye, na mokolo oyo elandaki. Akendeki liboso ntango na ye ékoka, bomoni. Malamú, soki oboi koyoka Nzambe, Nzambe akolongola yo na mokili.

⁹⁵ Bótala, kuna, na mokanda ya Bakorinti, ndenge Polo atiaki bato yango na molongo. Alobaki: “Liboso, natondi Nzambe mpo na bino, ete kati na bino, makambo ya ndenge wana ezali te, mpe nyonso wana, mpe mpo—mpe bozangi likabo ya molimo ata moko te.” Koyebisáká bango ndenge bazalaki, esika na bango, kati na Klisto. Bongo abandaki kopamela bango, koyebisa bango na ntina na basi-batei na bango, mpe lolenge bazalaki kobika mpe lolenge oyo bazalaki kolia na mésa na Nkolo.

Mpe kutu mobali moko oyo azalaki kobika ná mama bokilo na ye, mpe na mobali yango kati na Klisto, alobaki: “Bókaba ye na zábolo, mpo na kobebisama ya nzoto na ye, mpo molimo ébikisama.” Bomoni, ezali bongo, bókaba ye. Biblia elobi: “Na ntina oyo nde mingi kati na bino bazali na bokono ná bolembu, mpe mingi balali,” basili kokende liboso ya ntango na bango, mpo na lisumu. Soki Nzambe alongoli yo na nzela; ezali elemba ya malamú, kotalisa ete ozalaki Moklisto, soki olongolamaki.

⁹⁶ Boye, sikoyo bótala malamú awa, Saulo azuamaki lokola moko na basakoli, to kati na basakoli, mpo azalaki kosakola. Sikoyo, asilaki kozonga nsima, mpo atosaki Nzambe te, mpe bokonzi na ye elongolamaki na maboko na ye, mpe etiamaki na maboko ya Dawidi, oyo Nzambe autaki kopakola na nzela na Samwele, ná molangi ya mafuta.

⁹⁷ Bótala malamú, na ntango wana, bazalaki na ndenge misato mpo na koyeba makambo euti na Nzambe; ya liboso ezalaki—ezalaki mosakoli, ya mibale ezalaki ndoto, mpe ya misato ezalaki Urim Tumim. Mpe moko te na yango eyanolaki. Sikoyo, boyebi nini oyo mosakoli azali, boyebi nini oyo ndoto ya molimo ezali,

mpe boyebi nini oyo Urim Tumim ezalaki. Boyebi, mokolo mosusu wana, natunaki mo—moto moko na ntina na Urim, mpe moto yango akokaki koyebisa ngai te eloko nini yango ezalaki, Urim Tumim. Na ntembe te, Nzambe nde azalaki koyanola na banzela oyo. Bomoni?

⁹⁸ Mpe zabolo amekolaka ya moko na moko na yango; nganga-nkisi, mosakoli ya lokuta, mpe libanga ya solóka. Bomoni?

Sikoyo, Urim Tumim, ezalaki kofanda na ntólo ya Arona, *awa*, Urim Tumim ezalaki kozipa mabanga wana. Mpe bazalaki kofandisa yango na tempelo. Mpe soki bandimisami mpenza te, bakokende liboso na Nzambe, mpo na eyano, mpe polé moko ezalaki kongenga na Urim Tumim yango, mpo na koyeba soki ezalaki mokano na Nzambe, to te. Sikoyo, ntango Urim Tumim ezalaki koyanola te. . . Sikoyo, oyo wana ezalaki eyano ya mbala moko kouta na Nzambe.

Sikoyo, Urim Tumim ya lelo; moto na solóka azuaki libanga ya solóka, mpo na komekola Yango; eloko ya lokuta. Nzambe azalaka kati na bosato; banguya na Nzambe ezalaka kati na bosato. Mpe zabolo mpe azalaka kati na bosato, mpe banguya na ye ezali kati na bosato. Mpe nakoki kotalisa yango polele na Biblia. Ná Urim Tumim yango, ba. . . ezalaki kaka libanga ya solóka oyo zabolo akómi kosalela lelo. Mpe mosakoli ya lokuta awa lelo, oyo tozali na ye sikoyo azalaki, to, moto na solóka, to nganga-nkisi, kuna, azuaki esika ya mosakoli, na ngámbo ya zabolo. Bomoni eloko nini nalingi koloba?

⁹⁹ Sikoyo, na bongo, Urim Tumim lelo, ezali Biblia oyo. Soki moto apesi lisakoli moko to ndóto moko, mpe yango elóngobani te to ekokani te na Biblia ya Nzambe, ezali ya lokuta. Bóndima yango te.

¹⁰⁰ Moto moko ayaki epai na ngai, kala mingi te, autaki na Inde, esika nakokende, elenge motei moko ya malamú. Alobaki: “Ndeko Branham, nayeí awa.” Alobaki: “Mwasi moko azalaki na Molimo Mosanto, mpe,” alobaki, “azalaki mpenza mwasi moko ya bopolo mpe malamú mpenza koleka.” Alobaki: “Mpe abalá mbala minei, mpe azalaki kobika na mobali na ye ya minei. Mpe nalobaki: ‘Ee, ndenge nini ekokaki kosalema, Nkolo?’” Mpe alobaki: “Nakendeki epai ya Nkolo mpe nalobaki: ‘Oh, nkembo na Nzambe!’” Alobaki: ‘Aleluya! Nkolo ákumisama!’” Moto moko ya ndenge wana, boyebi. “Nalobaki: ‘Aleluya! Nkolo ákumisama!’” Alobaki: “Nkolo ayebisaki ngai: ‘Tala, Nakopesa yo ndoto.’” Mpe alobaki: “Nalotaki mwasi na ngai, namonaki ye kobikáká kati na ekobo. Mpe azongaki epai na ngai, mpe alobaki: ‘Oh, okoki kolimbisa ngai, Victor? Okolinga kolimbisa ngai? Na. . .’ ‘Ee,’ nalobaki, ‘na ntembe te, nakolimbisa yo mpe nakozongela yo.’” Alobaki: “Sikoyo, yango nde nasalaki.” Alobaki: “Omoni, ngai nalimbisaka.”

101 Nalobaki: “Victor, ndoto na yo ezalaki kitoko mpenza, kasi zabolo nde apesaki yo yango.”

Alobaki: “Mpo na nini?”

102 Nalobaki: “Elongobani ná Liloba na Nzambe te. Azali kobika kati na ekobo. Ya solo mpenza. Akoki kobika ná mibali minei te. Ya solo. Soki atiki oyo wana mpe azongi epai ya oyo ya ye ya liboso, akómi mabe mingi, koleka ndenge azalaki na ebandeli. Asengeli kobika monzemba, bomoi na ye oyo etikali.” Nalobaki: “Oyebi ete yango elongobani ná Liloba na Nzambe te. Boye, ye...Ndoto na yo ezalaki ya lokuta.” Nalobaki: “Ekolongobana ná Oyo te.”

103 Mpe ntango mosakoli moko apesaki lisakoli, mpe balobaki, mpe balingaki koyeba soki lisakoli yango ezalaki solo, bazalaki kotia yango liboso ya Urim Tumim. Mpe soki Mongongo na Nzambe engengisaki polé likoló na Urim Tumim yango, boye ezalaki mpenza, Solo. Mpe soki moto moko apesi ndimbola, apesi ndoto, apesi eloko moko ya Biblia, mpe, to eloko mosusu nini, mpe yango elongobani na Biblia ya Nzambe te, ezali ya lokuta. Yango nde ezali Urim Tumim lelo. Liloba na Nzambe elobaka, mpe wana ezali Mongongo na Nzambe na mbala moko, lokola Urim Tumim ezalaki, liboso ete Biblia ékomama. Amen! Aleluya! Nakómi komiyoka lokola mosambeli na ngonga oyo. Kobenga ngai fanatíki te, soki osalaka bongo. Nayebi, nayebi esika nini natelemi. Namemami te. Ya solo.

104 Oyo nde Solo, Liloba na Nzambe! Etali ngai te ndoto ya ndenge nini olotaki, to lisakoli ya ndenge nini opesaki, soki ezali Liloba na Nzambe te, ezali lokuta, soki elongobani ná Liloba wana te. Yango nde ezali mobulu lelo. Moko aloti ndoto, mosusu amoni emononeli, mosusu alobi monoko na sika, mosusu azui emoniseli; nyonso ekómi mpenza na mobulungano, mpe nyonso wana, bozali na ba-denomination mpe bokabwani ekoti bisika nyonso. Bosengelaki kozongisa yango na mobóko ya nsuka, mep yango ezali Liloba na Nzambe. Ya solo.

105 Mangomba ezali kotongama likoló na moko na yango, oyo elobi: “Oh, Yesu akoya likoló na mpunda ya mpembe. Nayebi. Namonaki Ye na emononeli.” Basali lingomba ya motindo wana. “Oh, aleluya! Akoya likoló na lipata.” Basali yango na ndenge wana. Bazali kokabwana, kopanzana, mpe kobengana nkombo ya “bifandelo ya bakokómbelé,” “biyanganelo ya basili,” mpe nyonso wana. Tala, ndeko, ezali kotalisa, mpo na kobanda, ete motema na yo ezali malamau te liboso na Nzambe, na ntango osali bongo. Ya solo. Tozali bandeko. Tosengeli kokangama bamoko na bamosusu. Tozali na bosenga ya bamoko na bamosusu.

106 Sikoyo bótala. Saulo azongaki nsima, mpe amati kuna. Ye, Nzambe, apesaki ye mokongo. Mpe amataki kuna mpe alukaki toli epai na basakoli yango. Basakoli bakendeki mpe bamekaki kosakola, kasi Nzambe akataki, aboyaki kopesa emononeli.

Mosakoli abimaki, alobaki: “Nakoki te. Te. Atikálá koyebisa ngai eloko moko te na ntina na yo.”

¹⁰⁷ Ee, na bongo, alobaki: “Nkolo, pesa ngai ndoto.” Butu moko nsima na mosusu, ndoto eyaki te.

¹⁰⁸ Na bongo akei liboso ya Urim Tumim, mpe alobaki: “E Nzambe! Nameki na basakoli, nameki na bandoto, sikoyo, sunga ngai. Okolinga kosala yango?” Akataki, Polé moko te engengaki ata moke te.

¹⁰⁹ Na boye alukaki mwasi moko ya solóka, ya nsé koleka, ya ntina te. Mpe akendeki epai na ye, amikotisaki kuna mpe amibongolaki. Mpe mwasi na solóka oyo akei mpe amatisi molimo ya Samwele.

¹¹⁰ Sikoyo, nayebi eloko nini bozali kokanisa. Mingi balobaki: “Ezalaki Samwele te.” Kasi Biblia elobi ete ezalaki Samwele, mpe ezalaki Samwele. Ékokamwisa ndenge okoki kosósola yango, boye te? Kasi ezalaki Samwele. Biblia elobaki ete ezalaki bongo.

¹¹¹ Mpe mwasi na solóka wana akokaki komatisa ye, mpe amatisaki Samwele. Mpe Samwele azalaki esika mosusu, kasi ayebaki likambo oyo ezalaki kosalema, mpe azalaki naino ya kotelema ná kazaka na ye ya mosakoli na nzoto na ye. Boye ndeko, soki okufi, ozali ya kokufa te, ozali na bomoi esika moko boye, esika mosusu.

¹¹² Botika nátelema naino mwa moke, mpo náfandisa boyekoli milimo mabe oyo mwa malamumu moke. Mwasi yango azalaki molimo mabe, kasi azalaki na boyokani makasi ná mokili ya milimo. Sikoyo, lelo, ezali na bato na solóka ebele oyo bayebi mpenza makambo ya mokili ya milimo koleka bato oyo balobaka bango moko ete bazali Baklisto, nzoka nde mwasi yango azalaki molimo mabe. Na ntango ya Biblia, ezalaki ndenge moko.

¹¹³ Ntango Yesu azalaki awa na mokili, ba-professeur, bato ya mayele mingi mpe balakisi bazalaki, bayike ya malamumu koleka bazalaki, bautaki na ba-seminére ya malamumu mpenza, koleka oyo tokoki kobimisa lelo. Basengelaki kozala basantu, bato na lokumu. Soki Moléwi moko azuamaki, asengelaki kozala na mbeba moko te, sembo na lolenge nyonso. Mpe ata bongo mobali yango ayebaki eloko te na oyo etali Nzambe, kaka ndenge lapin ayebi eloko te na oyo etali sapato ya matandala. Ntango Yesu ayaki, ayebaki Ye te, mpe abengaki Yesu “molimo mabe.” Alobaki: “Azali Bezezebula, mokonzi ya milimo mabe.” Ezali solo?

¹¹⁴ Mpe tala molimo mabe moko ya nsé koleka ayaki, oyo ekangaki mobali moko kuna na malita, mpe nyonso wana, mpe babelelaki. Molimo mabe ye moko alobaki: “Toyebi Nani Yo ozali. Ozali Mwana na Nzambe, Mosanto.” Ezali solo? Basi na solóka ná bandoki, milimo mabe, bayebaki Ye Mwana na Nzambe; na ntango oyo bato oyo batángá, batei ya ba-seminére

ya theologie bamonaki Ye azali Belezebula. Nani yango azalaki na solo, molimo mabe to motei? Molimo mabe. Mpe, ndeko, ebongwani mingi mpenza te lelo. Bazali koyeba nguya ya Nzambe te.

¹¹⁵ Etali te malakisi boni ozali na yango, okoki kokótisa yango na kati na yo. Nzambe azalaka kati na maloba ya minene te. Nzambe azalaka kati na motema ya sembo. Okoki kotelema wana, koloba maloba ya minene, lokola nayebi te soko nini, yango ekomema yo pene koleka na Nzambe te. Okoki kozala wana mpe koyekola lolenge nini ya koteya liteya na yo mpe koloba makambo nyonso oyo, yango ekomema yo pene koleka na Nzambe te. Okoki koyekola dictionaire kino okómi kolala na yango, kasi, ata bongo, yango ekomema yo pene koleka na Nzambe te. Motema ya komikitisa, ya botosi, na komikitisa, nde oyo ememaka yo epai na Nzambe. Mpe ezali solo. Amen! Motema ya komikitisa, nde Nzambe alingaka. Sikoyo, etali te soki oyebi ABC na yo te, yango ekosala bokeseni moko te. Kaka motema ya komikitisa! Nzambe afandaka na motema ya komikitisa; na mayele ya bongó te, ezali na biteyelo te, na theologie te, na ba-seminére te, na bisika mosusu nyonso oyo te; na maloba ya minene te, na bisika ya lokumu mingi mpe te. Nzambe afandaka na motema ya moto. Mpe koleka na nsé okoki komikitisa, komikómisa yo moko mpamba koleka, okoki kokóma monene koleka na miso na Nzambe.

¹¹⁶ Bótika nátalisa bino eloko moko. Namoni ete bilanga na bino etondi na blé, awa. Nzete oyo etondi na mbuma ya blé ezalaka ntango nyonso ya kogumbama. Okomona mwa litíti moko etelemi, mpe ebandi koningana ngámbo na ngámbo lokola ete eyebi nyonso, ezali na eloko te na motó. Ezalaka lolenge wana ná ebele ya bato oyo bakanisaka ete bayebi mingi na mitó na bango, mpe bazali na eloko moko te mitema na bango, ata bongo. Motó ya bule ekogumbama liboso na Nguya, ekoyeba Yesu Klisto lokola Mwana na Nzambe, mpe ekondima misala na Ye.

¹¹⁷ “Mpe Azali motindo moko, lobi.” Oh, bayebi Ye, solo mpenza, na lolenge ya masoló ya kala. Kasi ezali likambo ya masolo ya kala te. Bato batelemaka mpe balobaka: “Oh, ngai nandimaka Pantekote, ntango kosopana monene wana esalemaki, mpe makambo ya ndenge wana,” mpe bayémaka móto. Moto oyo azokufa na malili akoki koyóto na móto oyo bayemi te. Móto oyo bayemí epésaka molunge te. Yango nde oyo bango bazalaki. Yango ezali nini lelo, soki Ye azali motindo moko lobi, lelo mpe libela? Wana ezali móto bayemí. Moto moko azali kokufa na malili, alobi: “Tala móto monene oyo bazalaki na yango.” Tala, yango ekopesa yo molunge te.

¹¹⁸ Oyo bango basalaki na Pantekote, oyo bazalaki na yango na ebandeli ya Kondimana, tozali na yango lelo! Mpe kaka ntango Nzambe akosembola mpenza likambo yango, mpe Lingomba ekosangana elongo, Konétolama ekosalema. Kasi tozokoka ata

kozala na kondima mpo na lobiko na nzoto uta na Nzambe te, oyo ya Konétolama kútu koloba te, mpamba te tozali biso nyonso na yiki-yiki, moko azali lolenge *oyo* mpe mosusu lolenge *wana*. “Monganga *Songolo-pakala* alobaki ete Ezali *oyo* nde. Ee, motei na ngai alobaki ete Azali *Oyo* nde.”

¹¹⁹ Eleki mwa ntango, mwasi moko alobaki: “Azali kaka mokósi moko boye.” Alobaki: “Sángó na ngai moto ayebisaki ngai bongo.” Elingaki kozala malamú soki sánzó na ye akokaki koya awa mokolo moko, tokotala soki nani azali mokósi. Iyo. Tokotala nani azali mokósi. Bóya komeka yango.

¹²⁰ Eleki ntango molai te, awa, na Harlingen, na Texas, tozalaki na liyangani kuna. Mpe babambaki nkasa ya minene bisika nyonso na mituka na butu wana, ntango nakende ki kuna, balobaki ete FBI ezalaki kuna mpo na kobimisa ngai na mpwasa, lokola mokósi moko. Boye, mwana mwasi moko autaki kobikisama na Texas, esika moko, kuna. Azalaki mosika kuna likoló, mpe, na—nabanzi, na kilometre pene na nkóto moko na nkama mitano, mosika, pembeni ya Panhandle. Kasi likambo oyo esalemaki mosika kuna na Harlingen, kokita kuna na mondelo. Ndeko Baxter ayaki, alobaki: “Ndeko Branham,” alobaki, “otikálá komona mobúlungano ya ndenge wana te, kuna, bato bazali pene na nkóto minei to mitano.” Mpe alobaki: “Mpe lisusu, na zinga-zinga, FBI azali na likanisi ya kokanga yo na libunga, na etumbelo, na mpokwa ya lelo, mpe kobimisa yo na mpwasa.”

Nalobaki: “Ee, nasepeli na yango mingi.”

¹²¹ Alobaki: “Oyebi elenge mwasi oyo abikisamaki na mpokwa mosusu wana?”

¹²² Nazalaki kozonga longwa na . . . kokende kokóta na chambre na ngai. Nayokaki eloko moko lokola kolela, mpe natalaki zingazinga. Nakanisaki ete ntango mosusu bautaki kosala moto moko mabe. Ezalaki elenge mwasi moko. Natalaki na nsima. Nalobaki . . . Mpe nazongaki, nalobaki: “Likambo nini, Madame?” Ezalaki bilenge basi mibale nde batelemaki wana, ya mibu pene na zomi na nsambo to zomi na mwambe, bazinganaki maboko moko na mosusu, bazoleláká.

¹²³ Alobaki: “Ndeko Branham!” Nayebaki, na ntango yango, ete bayebaki ngai. Alobaki: “Biso, ngai moto namemaki ye nzela nyonso kino awa.” Alobaki: “Asengeli kokende na lopitalo ya bato ya liboma.” Mpe elenge mwasi yango azalaki na liyangani na ngai kuna, na Lubbock, na Texas. Mpe alobaki: “Nayebaki ete soki kaka nakokaki komema ye kino awa, mpe obondeli mpo na ye, nandimi ete Nzambe akobikisa ye.”

¹²⁴ Ee, nakanisaki: “Oyo kondima mpenza!” Mpe nalobaki: “Ee, sikoyo, ndeko mwasi, okoki koya na ye. . .” Mpe na mbala moko, nalobaki: “Boyei awa na motuka ya roadster, ya jaune, boye te?”

Alobaki: “Iyo!”

Mpe nalobaki: “Mama na bino azali ebósono.”

Alobaki: “Ya solo.”

Nalobaki: “Bosambelaka na lingomba Metodiste.”

Alobaki: “Ezali mpenza ya solo.”

125 Mpe nalobaki: “Ntango bozalaki koya awa, motuka na bino elingaki kobaluka. Yo ná elenge mwasi oyo bozalaki koseka ntango bolelaki na esika oyo ndambo ya nzela esalemaki na betón mpe ndambo mosusu na goudrón, mpe bozalaki kobaluka na libunu.”

Alobaki: “Ndeko Branham, ezali ya solo!”

Nalobaki: “Mpe, YANGO ELOBI NKOLO, elenge mwasi yango abiki.”

126 Na mokolo oyo elandaki, apelisaki móto na engumba mobimba, koyebisáká bato nyonso, koloba yango na bisika nyonso. Ya solo, kuna bayebaki ye te, bayebaki te soki azalaki na lolenge wana to te. Na bongo, mokolo yango, ngai. . . Ndeko Baxter alobaki: “Ndeko Branham,” alobaki, “bilenge basi yango bazali kuna, bazali kokanga bisaka na bango.” Mpe likambo moko ezali, oyo ye ayebaki te, kasi ngai nayebaki yango. Mbongo na biso etikalaki moke mpenza. Natikálá kopesa ye nzela ya kolobela yango te. Kasi moko na bilenge basi yango atiaki ba-dollar nkama libwa na ma—na makabo wana, na mpokwa oyo eutaki koleka, pe ematisaki mbongo yango. Sikoyo, ye ayebaki yango te kino mokolo oyo, ayebi yango te, kasi ngai nayebaki yango. Bomoni? Ete ngai. . . Nzambe ayebisaki ngai ete ekotambola malamumu.

127 Mpe Ndeko Baxter alobaki: “Ndeko Branham,” alobaki, “osengelaki kopesa ngai nzela ya kosenga bato mwa mbongo.” Alobaki: “Bayambáki babíkisi ya Bonzambe oyo awa, oyo basengaki bato oyo mbongo.”

128 Nalobaki: “Eloko moko te. Te misie. Okosala yango te. Ndeko Baxter, na ntango kaka oyo okosenga bato mbongo ndenge wana, ekozala ntango oyo yo ná ngai tokopesana mbote ya loboko lokola bandeko, nakokóba ngai moko.” Omoni? Nalobaki: “Yo kosala yango te.” Nalobaki: “Nzambe azali na bibwele likoló na ngomba nkóto, mpe biloko nyonso ezali ya Ye. Ngai mpe nazali ya Ye. Ye akobatela ngai.”

Alobaki: “Malamu.”

129 Mpe kaka na mpokwa yango, alobaki: “Ndeko Branham, tala awa. Moto moko. . . Tala awa! Enveloppe moko ezali awa, nkombo moko te ezali likoló na yango, ezali na nkasa libwa ya ba-dollar nkama. Kaka mbongo oyo tosengeli na yango mpenza mpo na kokóba mosala.”

Nalobaki: “Ndeko Baxter.”

Alobaki: “Limbisa ngai.”

¹³⁰ Na bongo, ngai nayebaki ete ezalaki elenge mwasi wana. Na bongo—na bongo, na mokolo oyo elandaki, Ndeko Baxter alobaki: “Ndeko Branham, bazali kuna, kokangáká bisaka na bango, bazolela.”

Nalobaki: “Likambo nini?”

Alobaki: “Ekozala malamú ókende komona bango.”

¹³¹ Nakendeki na chambre na bango, epai wapi bazalaki. Nalobaki: “Bazali na chambre nini?” Nakendeki kuna mpe nabetaki na ekuke. Nayokaki bango koleláká. Nabetaki na ekuke, mpe elenge mwasi yango ayaki na ekuke, alobaki: “Oh, Ndeko Branham, limbisa ngai.” Alobaki: “Ngai moto namemeli yo mobulu nyonso oyo.”

Nalobaki: “Mobulu? Likambo nini, ndeko mwasi?”

Alobaki: “Oh, mpo na ngai nde FBI ezali koluka yo.”

Mpe nalobaki: “Oh, ya solo?”

¹³² Alobaki: “Iyo.” Alobaki: “Nabanzi natatolaki mingi koleka, zingazinga na engumba lelo, mpe nyonso wana.”

Nalobaki: “Te.”

¹³³ Mpe alobaki: “Ndeko Branham, FBI ezali kuna, ezali kuna, balingi kobimisa yo na mpwasa na mpokwa ya lelo.”

¹³⁴ Nalobaki: “Ee, soki na—soki nasali likambo moko ya mabe, basengeli kobimisa ngai na mpwasa.” Bomoni? Nalobaki: “Na ntembe te. Soki koteya Nsango—malamu esengeli kobimisama na mpwasa, boye, tósala yango.” Omoni? Nalobaki: “Na—na—nabikaka kokokana na Biblia oyo, mpe likambo oyo Biblia oyo elobi te. . . Oyo nde bobateli na ngai, awa mpenza.” Bomoni? Mpe nalobaki, mpe ye. . .

Alobaki: “Ee,” alobaki, “limbisa ngai mpenza na likambo oyo nasalaki.”

Nalobaki: “Otikali kosala eloko moko te, ndeko mwasi.”

Alobaki: “Ee, ozobanga te kokende kuna?”

Mpe nalobaki: “Te.”

Alobaki: “Ee, FBI ezali kuna.”

¹³⁵ Nalobaki: “Ee, basílá koya na mayangani na ngai, liboso, mpe bazuaki lobiko.” Nalobaki: “M. Al Farrar. . .”

¹³⁶ Kapitène Al Farrar, mingi kati na bino boyebi na ntina na kobongola motema na ye, kuna na Tacoma, na Washington, abikaki na esika oyo bakendeke kobeta masasi. Ayaki na liyangani, alobaki: “Nalandelaki mobali oyo mibu mibale. Nayokaki likambo ya mbongo, mpe nalandelaki yango malamú, mpe nalukaki-lukaki bisika nyonso.” Mpe alobaki: “Ezali Solo, bozoyoka fanatíki moko boye te, na mpokwa oyo, bozoyoka nde Solo.” Alobaki: “Moko na bato yango oyo asalaka na police, nasalaki ete monganga átala nzoto ya mwana na ye

mpe nalekisaki ye na molongo ya mabondeli,” mpe alobaki, “mwana yango ayebisamaki mpenza bokono oyo azalaki na yango, mpe likambo oyo ekómelaki ye. Alobaki: ‘Na mikolo mwambe, akozonga na kelasi,’” bokono ya polio. Mpe alobaki: “Na mokolo ya mwambe, mwana yango azongaki na kelasi.” Alobaki: “Nalandelaki ye mibu mibale,” liboso ya bato nkóto zomi. Nyonso ezali kuna. . . Fotó na yango ezali kuna, liyangani ya Seattle, kati na—kati na buku na bino. Alobaki: “Nalingi ete bino nyonso bóyeba ete bozali koyoka mosambeli moko ya lokuta te. Bozali koyoka Solo.” Kapitène Al Farrar. Mpe mokolo elandaki, nakambaki ye epai na Nzambe, mpe azuaki libatishi ya Molimo Mosanto, na esika oyo babetaka masasi, kuna na nsé ya ndako moko ya monene.

Nalobaki: “Ntango mosusu mobali oyo mpe akosala bongo.”

Na bongo ye mwasi alobaki: “Ozali kobanga kokende kuna?”

¹³⁷ Nalobaki: “Kobanga? Ee, ata moke te. Ata moke te. Mpo na nini nasengeli kobanga na ntango oyo Nzambe nde atindaki ngai ete násala yango? Ye azali Moto oyo abundaka etumba yango, ngai te.” Na bongo, nalobaki: “Sikoyo, nalingi ete bino nyonso bózala mosika.” Na bongo. . .

¹³⁸ Tokendeki na liyangani na mpokwa wana, esika yango etondaki meké. Mpe mobáteli ya esika yango ayaki epai na ngai, alobaki: “Reverend Branham, nazui bana zomi ya ba-Mexicain na mosala.” Alobaki: “Tala: ‘Reverend Branham akobimisama na mpwasa, na mpokwa ya lelo na FBI, lokola mosámbeli moko ya fanatíki,’” to eloko mosusu moko ya ndenge wana. Mpe alobaki: “Etiyami na mituka moko na moko wana. Kolongola. . .” Alobaki: “Nazui bana-mike zomi ya ba-Mexicain na mosala, bazokende kolongola nyonso wana mpe kotia yango awa.” Alobaki: “Oh, nayoki mposa ya kokanga mobali yango!”

¹³⁹ Nalobaki: “Komitungisa te, misie. Nzambe akokanga ye.” Bomoni? Nalobaki: “Tika ye kimia.”

¹⁴⁰ Boye, ayaki epai nazalaki. Mpe na mpokwa wana ntango tokómaki, nakobosana yango ata mokolo moko te, nakotaki na ndako yango. Ngai. . . Ndeko Baxter ayembaki *Ndimba Kaka*. Alobaki: “Sikoyo, Ndeko Branham alobi ete na mpokwa oyo, tosengeli kotika ndako oyo.” Alobaki: “Nakozonga na nsima kuna na nsuka mpe nakofanda.” Alobaki: “Balingi kobimisa ye na mpwasa na mpokwa oyo, awa na etumbelo.” Alobaki: “Namóná ye na kati ya bitumba ya makasi ebele, mpe namóná Nzambe kozua esika na ye.” Alobaki: “Ngai—ngai nakokende na ngai kofanda kuna na sima.”

¹⁴¹ Namataki na etumbelo. Nalobaki: “Nauti kotánga mwa eteni ya zulunale moko awa ete nakobisama na mpwasa na mpokwa oyo, awa na etumbelo.” Nalobaki: “Nalingi ete basáli ya FBI bápúsana liboso sikoyo mpe basámbwisa ngai awa na etumbelo.” Nalobaki: “Nazali awa mpo na kobundela Nsango-

malamu; nalingi bóya kobimisa ngai na mpwasa.” Nazelaki. Nalobaki: “Ntango mosusu bakómi naino awa te.” Nayebaki esika nini natelemaki. Asilaki kolakisa ngai, kuna na chambre na ngai, likambo nini elingaki kosalema, liboso ete nákende, bomoni. Mpe nalobaki, nalobaki: “Ntango mosusu nakozela mwa moke. Tokoki koyemba loyembo moko?” Mpe moto moko ayaki koyemba loyembo ye moko.

¹⁴² Nalobaki: “M. mosali ya FBI, ozali na kati to na libanda? Nazali kozela ete nabimisama na mpwasa. Okoki koya awa liboso?” Moto moko ayaki te. Nakobaki komituna esika nini yango ezalaki. Nkolo asilaki koyebisa ngai nini oyo yango ezalaki. Ezalaki batei mibale oyo bazóngá nsima, mpe na—nazalaki kotala malamumu. Namonaki elilingi moko ya moindo eteleme na likoló, na litumu ya ndako. Nayebaki epai wapi yango ezalaki. Natalaki na ngámbo wana, emataki mpe ekendekei na balcon, boye. Mobali moko alataki kazaka ya bleu, mosusu alataki kazaka ya grís.

¹⁴³ Nalobaki: “Baninga, FBI ezali awa te. Koteya Biblia etali FBI na nini?” Nalobaki: “Na ntembe ata moke te. Ezalaki bato mibale ya FBI te mpo na kobimisa ngai mpwasa. Kasi, tala bato ya kosambwisa ngai bango oyo, bafandi kuna na likoló, batei mibale oyo kuna.” Mpe bagumbamaki. Nalobaki: “Bógumbama ndenge wana te.” Mpe bingambe mibale ya Texas balingaki komata kuna mpo na kokanga bango. Nalobaki: “Te, bandeko, oyo ezali likambo ya nzoto ná makila te, bófanda kaka kimia. Nzambe nde akotala likambo yango.”

¹⁴⁴ Nalobaki: “Sikoyo, bandeko, bótala, wana bozali kuna likoló, bótala ngambo oyo.” Nalobaki: “Soki... Bino bolobaki ete ngai nazali Simóna moto na solóka, ná bondoki, ete nazalaki koloka bato.” Nalobaki: “Soki ngai nazali Simóna moto na solóka, na bongo bino bozali bato na Nzambe. Sikoyo bókita awa na etumbelo oyo. Mpe soki ngai nazali Simóna moto na solóka, Nzambe ábeta ngai na liwa mbala moko. Kasi soki nazali mosakoli na Nzambe, bókita awa mpe tika ete Nzambe ábeta bino na liwa mbala moko. Sikoyo tokotala nani azali na solo mpe nani azali ya lokuta. Sikoyo bóya awa. Tokoyemba loyembo moko.” Basimbaki nzela mpe bakendekei, mpe totikálá komona bango lisusu te, banda wana. Bomoni? Nalobaki: “Bóya. Soki ngai nazali Simóna moto na solóka, tika ete Nzambe ábeta ngai na liwa mbala moko. Kasi soki nazali mosakoli na Nzambe, na bongo Nzambe ábeta bino na liwa mbala moko, ntango bokokóma na etumbelo oyo. Soki ngai nazali na bosolo liboso na Nzambe, Nzambe akotika bino bókufa na etumbelo oyo.” Bayebaki yango malamumu mpenza. Ya solo. Bayebaki bayebaki yango malamumu mpenza. Basilaki koyoka makambo oyo esálémá na bisika mosusu. Ya solo. Boye, bómekaka kokanisa te ete Nzambe atikálá lisusu Nzambe te. Ayanolaka.

145 Sikoyo, mwasi na solóka ya Ene-Dore oyo, abengaki molimo ya Samwele. Mpe Saulo asololaki na Samwele. Sikoyo, bokoki komituna ndenge nini yango esalemaki. Ekoki kosalema te lelo. Te misie. Mpamba te, makila ya bangombe-mibali ná bantaba, ezalaki kaka mpo na kozela ntango ya bokokisami. Na ntango wana, soki moto akufi. . . Batei, bósunga ngai soki bomoni ete Ezali bongo. Soki moto akufi, azalaki kokufa na nsé ya bolimbisi masumu na nzela ya nyama, mpe elimo na ye ezalaki kokende na Paradizo. Mpe azalaki kotikala kuna kino na—kino na Mokolo ya Lisiko. Mpe elimo na ye ezalaki kuna.

146 Tika nátalisa bino mwa likambo moko ya moke awa. Bato boni batangaki lisolo na ngai, to lisolo oyo bakomaki na ntina na ngai awa, na zulunále *Reader's Digest*, na sanza ya Zomi to ya Zomi na moko? Malamu. Bomonaki ndenge yango ezalaki? Bomonaki yango, mpóso mibale to misato liboso na yango, nganga-motáli monene oyo ayebani mingi awa, oyo balandelaka eleki ntango molai, Mme Piper. Moto moko atikalá kotanga yango, lisolo ya Mme Piper na *Reader's Digest*? Ezokamwisa te ndenge milimo mibale wana. . .

147 Natikali na ntango boni? Mingi te, bobele moke. Nalekisi miníti ntuku mibale, nasengeli mpenza kosala nokinoki. Nayebi bozali na. . . Bótala, bólimbisa ngai mpo na miníti moko.

148 Boyebi, ya lokuta e—ezalaka. Ya solo mpe ya lokuta ezalaka, na makambo nyonso. Soki napesi yo dollar moko, mpe nalobi: “Dollar oyo ezali ya malamumu?” Okotala yango, yango esengeli mpenza komonana lokola dollar ya solo, soki te, okondima yango te. Boye te? Bongo, ekosengela mpenza kozala eloko oyo emekolami malamumu.

149 Mpe soki Yesu alobaki ete milimo nyonso mibale, na ntango ya nsuka, ekozala mpenza pene na lolenge ete ekopéngwisa mpenza Baponami, soki ekokaki kosalema, bato na lolenge ya basámbeli. Sikoyo bómikanisela. Sikoyo, eloko moko ezali kuna te, na mangomba ya kala wana, ya mal- . . . ya mim- . . . ya malili, ya mimesano. Na libanda, bazalaka kaka na lolenge basámbeli, bomoni. Kasi milimo mibale oyo, milimo ya solosolo, ekozala mpenza pene ete ekopéngwisa ata Baponami, mpenza ndenge bakosala mosala, mopanzi na mopanzi, na mikolo ya nsuka. Yesu alobaki yango? Alobaki yango.

150 Sikoyo bótala malamumu, baninga, nakotalisa bino likambo moko ya moke. Nalingi ete bótala awa mwa moke. Mpe bópesa ngai bokebi na bino nyonso mpenza, mpo nakopesa bino lisese moko, na nsima, bokomona yango.

151 Sikoyo, na zulunále *Reader's Digest*, ekomamaki kuna, nazalaki ya kotelema kuna, tozalaki na bato nkóto mibale na nkama nsambo, oyo bazalaki kozela ete tóbondela mpo na bango, batelemaki kuna. Bótanga lisolo yango. Mpe mobali moko ayaki longwa na Canada, azalaki na mwana-mobali moko ya moke oyo

autaki na lopitalo ya ba-Mayo mpe ya John Hopkins, azalaki na bokono makasi ya bongó, oyo esalaki ete mwa maboko na ye égumbama *boye*, mpe egumbamaki makolo na ye na nsé. Mpe balobaki: “Lipasó ata moko te to eloko moko te ekoki kosalema.”

¹⁵² Na bongo, azongaki na ye na Canada. Alobaki: “Nalóngami naino te.” Bózua zulunále *Reader's Digest* ya sanza ya Zomi na moko, mpe babengi yango e—e—*Ekamwiseli ya Donny Morton*. Na—na bongo, alobaki ete e, na kati kuna, ete mo—ete mobali yango alobaki: “Naino nalóngami te, mpo nayebi moto moko abikisaka na kondima, nkombo na ye William Branham, oyo asalaki ete baninga na ngai mibale, oyo bazalaki babába mpe bakúfá matoi, bákóma koloba mpe koyoka.”

¹⁵³ Mpe babengaki mpo báluka koyeba esika nini nazalaki, naino na—na Amerika. Mpe nazalaki na Costa Mesa, na Californie. Mpe ezali lisolo ya zulunale, ntango bokotángá yango, bómilengela mpo na kolela. Ekozokisa bino na motema. Ndenge alekaki na kati na mbóngé ya matandala, mpe biloko mosusu nyonso wana, elongo ná mwana yango! Alobaki: “Sala keba, Donny.” Alobaki: “Sikoyo, biso tolóngami te.” Mpe mwana mobali yango azalaki kokoka ata koseka te, na mpasi mpenza, mpo azalaki na mpasi makasi. Alobaki: “Tolóngami te, tokosenga na Nzambe. Tokokende epai ya mosakoli na Nzambe mpe tokotuna ye.”

¹⁵⁴ Boye, balekaki na kati ya matandala. Sukasuka bakómaki kuna, mpe mama azalaki koya elongo na bango, kasi bazalaki na mbongo mingi te mpo na koya na mpepo, boye, bazongisaki mama yango. Mpe mwana mobali yango ná papa basengelaki koya na bus, mpe basalaki mobembo molai, banda na Winnipeg, na Canada, kino na Costa Mesa, na Californie. Mpe bakómaki kuna, ná mbongo te, mpe tata yango azolobela ndenge asengelaki kobongola ba-kúshe ya mwana yango, mwana mobali ya mibu nsambo to mwambe, ebósono mpenza. Mpe ndenge azalaki ko . . . akokaki kozua libaku ya kolia to kosala eloko moko te, mpe alobaki ete mwana moke na ye azalaki kaka koyoka ye koloba. Mpe azalaki koyeba, lolenge miso na ye ezalaki kotala, ete azalaki—azalaki komeka komunga-munga, boyebi. Mpe azalaki koyeba ete ye . . . Azalaki koyebisa ye bisika ndenge na ndenge, oyo azalaki komona, awa na Amerika.

¹⁵⁵ Mpe ntango bakómaki kuna, na Californie, bayebisaki mosungi na baí-mibembo, nini oyo ayaki kotala. Alobaki: “Oyei kotala nini ya Nzambe?” Ná motuna monene mpenza.

¹⁵⁶ Na ntembe te, bokoki kokanisa ndenge Amerika elobaka na ntina na yango, bomoni. Bomoni, wana nde biso, bomoni: “Tozali mayele mingi! Toyebi nyonso, boyebi, mpe ntina ya koyebisa biso makambo ezalaka te. Bisó, tosílá kokoma yango nyonso.” Bomoni?

157 Na bongo, boye: “Nini ya Nzambe? Bouti mosika, longwa na Winnipeg, na Canada?” Ee, bakanisaki ezalaki likambo ya nsómo.

158 Ata bongo, zulunále ebongisaki mo—motuka moko mpe etindaki ye kuna. Mpe alobaki, ntango bakómaki na molongo yango, esika yango ezalaki kosalema, alobaki ete bato nkóto mibale na nkama nsambo bazalaki kozela ete bábondela mpo na bango. Kasi, alobaki, ntango bamonaki mwana mobali yango, lokola mwana moke, ná lolenge ya kobeba, ná mobola ya papa wana ekoti na ye na motó, ná kazaka epasúká, alobaki, moto nyonso apusanaki pembeni mpe atikelaki ye esika. Ntango akómaki na etumbelo. . .

159 Kopesana kaláti ya mabondeli, ezali libanda na mibeko. Moto asengeli koya na liyangani mpe kozua kalati na ye moko. Soki bakangi yo, na kati ya molongo, ozali kopesa kalati ya mabondeli na moto mosusu, kalati ya mabondeli yango ekotángama lisusu te. Bomoni? Mpamba te, osengeli koya koyoka malakisi esengeli mpe koyeba ndenge ya kozua yango. Ezali likambo na yo. Okoki koya kozuela moto mosusu te. Osengeli koya kozua yango yo moko, mpo óyoka. Moto moko ya lokumu alobaki: “Soki. . . Ee, nandimelaka mpenza likambo oyo te. Kasi, ntango mosusu, soki Abikisi ngai, na. . .” Bomoni? Na nsima, epesaka mindondo na etumbelo, na bongo balongolaka yango, liboso ete ékóma kuna.

160 Boye, ntango mwana mobali yango apusanaki, to ntango tata na ye apusanaki na etumbelo, liboso na bato mosusu, Billy atunaki ye kalati na ye ya mabondeli. Azalaki na yango te. Alobaki: “Soki bongo, bolimbisi, misie.” Alobaki: “Osengeli kozela.”

161 Alobaki: “Malamu.” Alobaki: “Nakozela.” Alobaki: “Nakoleka kaka na ntango na ngai, lokola bato mosusu, soki bongo.” Alobaki: “Nayebaki te ete nasengelaki kosala bongo.”

162 Na bongo nazalaki koloba na moto moko, mpe esalemaki ete nayokaki yango. Namonaki tata yango kokende, mpe nalobaki: “Ezalaki likambo nini?”

Alobaki: “Azalaki na kalati ya mabondeli te.”

Mpe Eloko moko elobaki na ngai: “Zongisa ye awa.”

163 Boye, nalobaki: “Memá ye awa.” Tata yango ayaki, mpe mpisoli ezalaki kokita na elongi na ye, asengelaki kokatisa mandefu. Mpe a—apusanaki, mpe bótala ndenge *Reader’s Digest* elobi. Bomoni? Natunaki motuna moko te, kasi natalaki semba na miso ya bebe yango, mpe nayebisaki bebe yango esika autaki, ete akendeki na Clinique Mayo, mpe nyonso oyo ezalaki kotambola malamau te epai na ye, ndenge autaki kobela, mpe nyonso wana.

¹⁶⁴ Na bongo, tata yango abandaki kolela, mpe abandaki kokende. Mpe alobaki ete abandaki kokita na etumbelo, abalukaki mpe alobaki: “Ya solo, misie.” Alobaki: “Kasi mwana na ngai akobika?”

¹⁶⁵ Nalobaki: “Oyo wana, nayebi te.” Nalobaki: “Zela naino.” Namonaki emononeli moko. Nalobaki: “Okolinga kondima yango te, mpo balopitalo nyonso mibale, Mayo ná Hopkins, balobaki ete lipasó yango, ekoki kosalema na bongó wana te, kasi, nakoyebisa yo nini kosala. Yo, lobi, kende kaka liboso ná bebe oyo. Na mikolo misato oyo, okokutana na mwasi moko ya suki ya moindo na balabala, mpe mwasi yango akotuna yo likambo nini ezali kotambola te ná bebe yango. Na nsima, akolobela yo na ntina na mwa monganga moko ya mboka, awa, oyo akoki kosala lipasó yango, mpe yo okolinga kondima yango te, mpo lopitalo ya Mayo eboyaki kosala yango mpe elobaki: ‘Ekoki kosalema te’. Kasi yango nde libaku malamumu bobele moko oyo bebe na yo azali na yango: na nguyana na Nzambe, na mawa na Nzambe mpe na lipasó wana. Sikoyo, soki ondimi ete ngai nazali mosakoli na Ye, kende kosala ndenge nayebisi yo.” Lokola likambo ya kopakola Ezekiya miwiti, mpe bongo na bongo.

Alobaki, abalukaki mpe alobaki: “Matondi.” Akitaki.

¹⁶⁶ Nsima na mikolo mibale to koleka, azalaki na balabala, mokolo moko, mpe mwasi moko apusanaki, alobaki: “Likambo nini ná bebe na yo?”

¹⁶⁷ Alobaki: “Azali na—na bokono na bongó na ye.” Mpe akobaki, azalaki koloba ndenge wana. Mpe, ee, ba—bamonaki ete ezalaki mpasi mingi, boyebi.

¹⁶⁸ Boye, alobaki ete nsima na miníti moke, likambo moko esalemaki. Ye mwasi alobaki: “Misie, nayebi moto moko, oyo akoki kosala lipasó wana.”

¹⁶⁹ Alobaki: “Madame, yoka, lopitalo ya Bandeko Mayo bakoki kosalisa ye te, mpe balobaki ekoki kosalema te.” Alobaki: “Mobali moko, awa, abondelaki mpo na ye, nkombo na ye Ndeko Branham.” Alobaki: “Abondelaki mpo na bebe yango.” Alobaki: “Zela naino! Suki ya moindo, alati kazaka ya grí.” Alobaki: “Ezali mwasi yango.” Alobaki: “Monganga yango azali wapi?” Mpe ayebisaki ye. Amemaki ye kuna mpe monganga yango asalaki lipasó yango, bebe yango akomaki malamumu.

¹⁷⁰ Sikoyo, bakomaki yango na zulunále *Reader’s Digest*, bomoni. Mpe lopitalo ya Bandeko Mayo babengisaki ngai mpo bátuna ngai mituna na ntina na yango. Balobaki: “Rev. Branham, osalaki bebe yango nini?”

¹⁷¹ Nalobaki: “Eloko te. Natikálá kosimba ye te. Nalobaki kaka oyo Nzambe alobaki na ngai náyebisa ye. Mobali yango atosi yango.”

¹⁷² Sikoyo, likambo ya kokamwa na ntina na yango, pene na mpóso mibale nsima na yango, to mpóso mibale liboso na yango, to misato, na zulunále *Reader's Digest*, ntango mosusu sanza mobimba liboso na yango, bakomaki likambo ya Madame Piper. Sikoyo, azali mwasi na solóka ya solosolo, to nganga-motáli. Sikoyo, ezali na moko oyo ya solosolo, mpe ezali na moto moko azomekoláká. Mwasi yango asalaka yango banda mobu 1897. Akokisi mibu koleka nkama moko sikoyo, na New York, bango mibale...akufá matói. *Reader's Digest*, bóluka kozua...Nakanisi ete oyo wana ebimaki eleki sánza mibale to sanza moko liboso na oyo ya ngai; mpe bokoki komona yango, na ebandeli ya automne. M. Baxter azalaki na yango awa, mokolo mosusu wana. Soki nakanisaki yango, nalingaki kosenga ye...to soki náyebaka ete nakoloba likambo oyo, na—nalingaki koya ná yango. Nakoki kolukela bino yango. Mpe likambo yango ezui pene na nkasa zomi na mibale to zomi na minei. Azaláká kaka mwasi ya ndako. Mpe mokolo moko akotaki na molimo, wana azalaki kati na mpasi, mpe abandaki kosolola na bato bakufá. Mpe bamemá mwasi yango na mokili mobimba, na bisika nyonso. Bamemaki ye na Angleterre. Babongolaki ata elateli na ye, mbala mingi, mpo báyeba soki bazangaki kosimba likambo moko, mpe nyonso wana, bakendeki kuna, mpe babongolaki lolenge ya moto moko, balatisaki ye máske na elongi, azalaki Greki, mpe azalaki kosala lokola ete azali Anglais. Mpe ayebisaki ye nyonso wana. Mpe a—a—alingaki kobengisa moko na baninga na ye moko oyo akufá.

¹⁷³ Sikoyo, eloko bobele moko oyo ye...Na mokili mobimba, mpe ekomami awa na *Reader's Digest*, awa, eleki mwa bampokwa, to eleki mwa basánzá, moko na makambo yango ebimaki na mpwasa. Mobali moko asengelaki kopwepwa loboko ya elímá ya mama na ye, Mpe mokolo oyo elandaki, etalisamaki polele na tribinále ya police, ete apwepwaki kaka eteni ya elamba oyo bazíngelaka fromage. Bato mingi bamekolaka kozala nganga-nkisi! Bazali kaka mwa batáli makambo wana, oyo bafandaka na ngambo ya balabala, oyo bazali banganga-nkisi te mpo na kobanda. Bazali kaka bamekoli ya lokuta. Kasi nganga-motáli ya solosolo mpe azalaka.

¹⁷⁴ Bisó basámbeli mpe, tozali na bamekoli mingi, na ngámbo nyonso mibale. Sikoyo bófanda naino kimia mwa moke.

¹⁷⁵ Sikoyo bótala malamú, Madame Piper wana azali nganga-motáli ya solosolo. Mpe zulunále yango elobaki: “Likambo moko, oyo ekoki kondimisama, ezali ete, ntango moto akufi, akufi te. Azali na bomoi na esika moko boye, mpo mwasi yango abengisaka lisusu milimo na bango mpe esololaka na bato.”

¹⁷⁶ “Sikoyo, asalaka nini, Ndeko Branham? Ondimaka yango?” Iyo misie. Biblia elobi yango, yango wana nandimaka yango. Mpe azali ya zabolo. Kisolóka ezali mayele mabe ya zabolo. Sikoyo bótala, sikoyo bótala bango mibale malamú.

¹⁷⁷ Na bongo, bosengelaki komona mikanda oyo ekómelaki ngai, na nsima, ntango lisolo na ngai na zulunale ekomamaki nsima na oyo ya ye. Ezali kokamwisa te, ete kaka liboso ya suka ya ntango, Nzambe alobelaki makambo oyo? Mpe *Reader's Digest* ekomamaka na minoko nyonso ya mokili. Bomoni? Bótala malamú, ezali kokamwisa te, ete elandanaki moko nsima na mosusu?

¹⁷⁸ Sikoyo, mikanda eyaki, elobaki: “Ndeko Branham, yango ezali kotalisa polele ete ozali kaka ngangá-nkisi.” Balobaki: “Etalisami polele. Tala awa, oyebisaki mwasi wana esika nini akomona . . . Tala mwasi *oyo*?”

¹⁷⁹ Nalobaki: “Zela naino.” Nakomaki mpenza mokanda, (bólimbisa ngai), mpo na kotinda yango na bato yango. Nalobaki: “Bino batei, bozali na boyébi moke.” Nalobaki: “Na esika ya kobatisa nzoto na bino, bosengeli kobatisa nde babongó na bino.” Ya solo. “Botelemaka te mpo na kokanisa makambo. Bomekaka kokóta na bozindo na yango te.”

¹⁸⁰ Ndenge wana nde bazalaki kosala, na mikolo mosusu wana. Bamonaki Yesu. Bayebaki ete Akokaki . . . Ayebaki basekele ya mitema na bango. Ayebaki makambo bazalaki kosala, ndenge wana. Kasi balobaki: “Azali mokonzi ya milimo mabe. Azali Bezezebula, molobeli-masapo ya malamú koleka na mokili.” Batelemaki te mpo na komeka kosósola likambo yango, mpo na komona ete ezalaki nde Mwana na Nzambe. Bazalaki mpenza bato ya molimo te, mpo na koyeba yango. Yango mpenza, batángaka yango likoló-likoló. Ya solo, Yesu asengelaki kokóta na Yelusaleme, likoló na mbalata-mpunda, mpe nyonso wana, kasi bango bazalaki kotala Boyei ya mibale.

¹⁸¹ Mpe ndenge moko lelo! Bazali kotala likoló ya eloko ya solosolo. Aleluya! Ya solo. Nayebi ete Nzambe azali awa, nsima ya nzánga oyo, mpe nayebi ete nazali kozua bino ntango mingi, kasi bosengeli komona yango, moninga. Soki natikali komona bino lisusu te, bosengeli koyeba eloko nini milimo mabe ezali, bosengeli koyeba eloko nini Sólo mpe libunga ezali. Pe ezalaka mpenza penepene, bosengeli kokabola likambo yango.

¹⁸² Sikoyo, bómikanisela, ekozala kuna te, eloko moko ya mosika mingi na ngámbo *oyo*, lokola Bafalisai, to eloko moko ya mosika nsima na ngámbo *wana*. Ezali awa mpenza pene na ekuke, ezali mpenza pene na yango. Bótala yango malamú. Sikoyo, soki nazuaki . . .

¹⁸³ Tózua makambo mibale wana. Soki nazui dollar mpe napesi yo yango, sikoyo, soki napesi yo dollar ya lokuta. Tokosalela lisele, mpo bókoka komona yango. Eloko ya liboso okosala, soki ozali moto ya mayele, soki ozui dollar mpe otali yango, eloko ya liboso, okomama yango mpo óyeba soki esalemi na eloko nini. Ezali solo? Okotala soki esalemi na eloko nini. Okotala motuya na yango. Dollar ya solosolo, esalemaka na lokasa pamba te,

ezalaka papier ná swá esángáná, bomoni. Mpe eloko ya liboso, osengeli kotala motuya na yango. Yango nde likambo ya liboso.

184 Sikoyo, tótia mwasi yango na ngámbo *oyo*; mpe tótia Nkolo na ngámbo *oyo*, *oyo* ezali likambo na biso.

185 Sikoyo bótala, eloko ya liboso *oyo* bosengeli kotala malamumu, nyonso. . . Bótálá lisolo na zulunále na bino malamumu. Na mibu ntuku mitano ná mwa kobakisa ya kosalela kisolóka na ye, mpe kobengisáká milimo ya bato bakúfá, atikali ata mbala moko te koloba likolo na Nzambe, Klisto, lobiko na nzoto uta na Nzambe, kokangolama, Kosambisama, to eloko moko te. Eloko moko ezali te, kaka maseki mpe bolemá na likambo yango.

186 Kasi na ngámbo *oyo*, ezali ntango nyonso Nzambe, Kosambisama, Boyei ya Yesu, lobiko ya nzoto uta na Nzambe, nguya na Nzambe, kokangolama. Bótala motuya na yango. Bomonaka banganga-nkisi ná basi na solóka koya koteya Nsango-malamumu te. Likambo nini ná bato? Oh la la! Bótala malamumu!

187 Mpe eloko ya solosolo ya kosala, soki olingi koyeba soki ezali dollar ya solo to te, soki ezali komonana mpenza lokola yango, zua motángó na yango mpe tinda yango esika basalaka mbongo. Mpe soki motángó moko ezali kuna, *oyo* ekokani ná yango, dollar moko ya paláta ezali kozela yango. Boye te?

188 Ee, na bongo, ndeko, zua likambo *oyo* mwasi yango asalaki mpe kokanisa yango na Biblia, okomona ete ezali mwasi na solóka ya Ene-Dore.

189 Mpe soki ozui *oyo* ezali awa, okomona yango lisusu, ezali awa na Buku, esika basalaka Mbongo: “Yesu Klisto, motindo moko lobi, lelo mpe libela.” Ya solo, mosala moko *oyo* ya Ye! Akendeki kosala bolémá mpe bozoba ná bato te. Ezalaki mpo na bolamu moko boye, mpo na kosunga moto moko, mpo na kokamba bango epai na Nzambe. Amen! Nazali koloba “amen” na ngai moko te, kasi *amen* elingi koloba “ésalema bongo.” Mpe nazali. . . nandimi Yango. Nayebi ete Ezali Solo.

190 Sikoyo bótala malamumu, yango mpenza. Sikoyo, noki-noki sikoyo, mpo nalingi lisusu kokanga bino ntango molai te.

191 Tala, tótalisa likambo moko ya moke awa, likambo moko ya moke na likanisi. Awa, mokelé moko eleki awa, eleki na ngámbo *oyo*, eleki na bomoi mobimba. Sikoyo bótala malamumu. Ezali elekelo. Bópesa ngai bokebi na bino nyonso sikoyo, mpo bózanga likambo *oyo* te. Kolanda nyonso *oyo* boye. Sikoyo, na mwa elekelo *oyo*, bikelamo ya kufa *oyo* efandaka awa, bino ná ngai. Sikoyo, kuna na kati, tótala nini *oyo* yango ezali. Etondi na bolémá mpe na makambo nyonso mosusu, kasi mbala na mbala, okomona polé moko. Okomona molili mpe babalabala, wana ezali nde bisengo mpe bisálélá, milimo mabe ékokangáká bato. Oh, balataka malamumu, oh, mpe bazali na mayele mingi mpenza,

batángá mingi mpenza, kasi, ata bongo, ezali zabolo. Kasi bato mosusu bazali kuna, babótámá mbala ya mibale.

¹⁹² Sikoyo, bato oyo na kati ya elekeli oyo babéndamaka na ngámbo nyonso mibale. Sikoyo, kokende boye na ngámbo *oyo*, ezali na bosáto moko. Mpe kokende boye na ngámbo *oyo*, bosáto moko ezali kuna.

¹⁹³ Sikoyo, soki, sikoyo, na esika ya liboso, na ngámbo *oyo*, ezali na milimo ya *bazángi sembo*, soki moto akufi, akendeke na esika moko mpo na kozela kosambisama. Yesu akendeke koteya milimo yango, oyo ezalaki na boloko kuna. Oyo elandi, ezali milimo mabe. Oyo elandi, ezali zabolo, na ewélo. Komata, oyo ya liboso, sikoyo, baoyo bazali kuna, bazali milimo, milimo ya bato bakúfá, oyo batikálá kobongola motema te. Bazali kozela Kosambisama. Eloko bobele moko oyo bango bayebi, ezali bolémá mpe makambo oyo basalaki.

¹⁹⁴ Sikoyo, na likoló awa, Baklisto oyo bazali babendama longwa na Likoló. Oyo ezali liseke. Na likoló awa, Molimo mosusu ezali, Molimo Mosanto, Molimo ya Moto moko, Yesu Klisto. Molimo Mosanto, Molimo Mosanto abendaka Lingomba na Ye, na mosánda oyo ya ekelamo ya kufa.

¹⁹⁵ Zabolo, na nzela na milimo *oyo*, abendaka bato. Sikoyo, bótala, oyo elandi, ezali Banje. Oyo elandi, ezali Nzambe. Sikoyo, moto nyonso na mokili oyo abendamaka na moko na mikili oyo. Bomoni oyo nalingi koloba?

¹⁹⁶ Sikoyo, likambo oyo mwasi wana asalaki, akotaki na mosánda wana. Mpe azali kosolola na bato wana, baoyo bakonzami na milimo mabe, oyo, na ebandeli, ezalaki milimo ya banje oyo bakweyaki, oyo babongolaki motema te, kuna, na ebandeli, mpe batikaki ete bomoto na bango ékonzama na yango. Mpe bazali kozela Kosambisama.

¹⁹⁷ Mpe *baoyo*, awa, bazali kobéndama mpe kobótámá mbala ya mibale, na Molimo ya Nzambe. Mpe zabolo azali na basakoli na ye, Nzambe mpe azali na baoyo ya Ye. Bomoni nini nalingi koloba? Ezali likambo ya kobendama, mpe yango wana. Bótelema wana mpo na koyeba bokeseni. Yesu, ntango Azalaki awa na mokili . . .

¹⁹⁸ Sikoyo, lelo, akoki kokóta na mosánda wana te, mpe kobimisa moyengebene moko na mosánda wana. Akoki kosala yango te, mpo bayengebene bazali lisusu na esika oyo bazaláká te, na Paradizo. Te misie. Paradizo elongwá, ntango Makila na Yesu elongolaki yango. Bóyoka. Oh!

¹⁹⁹ Soki nakokaki kokanisa na lolenge oyo Yesu, ntango Akufaki, Akendeke koteya milimo oyo ezalaki na boloko. Akufaki, mosumuki, oyebaki lisumu moko te, kasi lisumu na biso ezalaki likoló na Ye. Mpe Nzambe, mpo na masumu na Ye, atindaki Ye na ewélo. Biblia elobi: “Akendeke koteya milimo.”

200 Bato mosusu balobaka: “Ndeko Branham, nakoki kosósola yango te.” Balobaka: “Yesu asekwaki mokolo ya misato. Akufaki mokolo ya mitano nsima ya nzánga mpe Asekwaki mokolo ya lomingo na ntongo, ee, Akufaki kaka mokolo moko.”

201 Alobaki: “Na kati ya ntango wana,” mpo Azalaki na Likomi moko na Biblia, oyo Akokaki kotelema likoló na yango. Mpamba te, Dawidi, moto oyo azongaki nsima, na nsima, kasi abikisamaki, kasi mosakoli moko, na nsé ya mpémelá ya Nzambe, alobáká: “Nakotika molimo na Ye na ewélo te, Nakotika mpe te Mobulani na Ngai komona kopola.” Mpe ayebaki ete nsima na mói misato mpe butu misato, ete nzoto wana ekobanda kopola. Mpe Nzambe asiláká koloba na mosakoli ete: “Akomona kopola te.” . . . ? . . . [Maloba mazangi na bande—Mok.]

Aleluya! Azuaki Liloba na Nzambe. Alongaki Satana, mbala nyonso, ná Yango. Alongaki liwa, ná Liloba na Nzambe. Aleluya! Alongaki liwa. Mpe ntango babomaki Ye, mpe Akufaki, mosumuki, masumu na ngai ná masumu na bino ezalaki likoló na Ye, Akitaki na nsé kuna, nakoki komona Ye kobeta ekuke kuna.

Mpe milimo oyo ebungaki eyaki mpe elobaki: “Ee, Yo Nani?”

202 Alobaki: “Mpo na nini boyokelaki Enoke te? Mpo na nini boyokelaki basakoli mosusu oyo bateyaki te?” Bakweisamaki. “Ngai nde Mwana na Nzambe oyo azalaki na bomoi. Nazali na . . . Makila na Ngai esili kosopana. Nayeri koyebisa bino, Nakokisi oyo basakoli balobaki ete Nakosala.” Akitaki mpenza kuna na nsé, koleka esika ya milimo mabe, kino na ewélo, mpo na kobotola bafungola ya liwa mpe ya ewélo na zabolo, atiaki yango na lokéto na Ye, mpe amataki. Aleluya!

203 Ntongo ebandaki kotána. Aleluya! Tótalisa likambo moko ya moke awa. Na ntongo-ntongo, etóngá mosusu ezali awa, na Paradizo. Sikoyo bazali kuna te.

204 Sikoyo, bino baninga na ngai minene ya ba-Katoliko, baoyo bondimaka ete basantu balobelaka bino. Soki osololaka na mosanto moko na lingomba na bino, moto yango azali mosumuki, azali na ewélo, to—to azali kozela kosambisama na ye kuna. Mpe soki azalaki mosanto, azali kati na nkembo ya Nzambe mpe akoki kozonga te. Ya solo. Nakoki kotalisa bino yango polele. Makila ya bangombe mibali ekokaki kolongola lisumu te, kasi Makila na Yesu elongolaki masumu.

205 Nakoki komona Yesu komata kuna na esika yango, na Paradizo, tala mobange Abraham, Yisaka ná Yakobo, ná bamosusu kuna, Samwele ná bamosusu na bango nyonso bazalaki kuna. Nakoki koyoka Ye kobeta ekuke. [Ndeko Branham abeti eteyelo mbala motoba—Mok.] Amen! Oh, nasepelaka na likambo oyo. Nabandi kokóma . . . komiyoka lokola mosambeli sikoyo. Nakoki komona Ye kotala kuna.

Nakoki koyoka moto moko koloba: “Nani azali kuna? Ezali Nani kuna?” Alobaki: “Ngai, Abraham nde azali koloba. Ezali Nani?”

²⁰⁶ “Ngai nde Momboto ya Abraham.” Amen. Nakoki komona Abraham koya na ekuke, kofungola ekuke. Alobaki: “Nazali Momboto ya Abraham.”

Daniele alobaki: “Bótala kuna! Wana nde Libanga oyo namonaki kolongwa na ngomba.”

²⁰⁷ Nakoki koyoka Ezekile koloba: “Tala Ye wana! Namonaki Ye, lokola putulú na nsé ya makolo na Ye, mapatá ezalaki kotepatepa, ntango bampate ya mibali. . . babetaki maboko na bango, nkasa, mpe bango nyonso bagángaki.” Oh, nakoki komona bato ndenge na ndenge kuna na Paradizo, kozeláká Ye.

²⁰⁸ Nakoki koyoka Ye koloba: “Bóya! Ntongo ebandi kotána kuna na Yelusaleme. Tosengeli kobima awa. Tozomata, mpo botiaki motema na makila ya bangombe mibali mpe bantaba mibali, kozeláká ngonga ya Makila na Ngai. Kasi Makila na Ngai esili kosopana kuna na Kalvari. Ngai nazali Mwana na Nzambe oyo alati nzoto. Banyongo nyonso ya lisumu efutami. Tozali na nzela mpo na kobima!” Aleluya! Nkembo na Nzambe!

²⁰⁹ Nakoki komona Abraham kosimba Sara na loboko, mpe bango wana, bazali koya mpo na kobima! Na Matai 27, ntango abimaki, nakoki koyoka bango kotelema mwa moke zingazinga na Yelusaleme, kuna. Mpe na mbala moko, nakoki komona Kaifa ná bamosusu kuna na balabala, kolobáká: “Bazoyebisa ngai ete moto wana asekwi. Hé, mobali wana oyo azokendéké kuna,; elenge mobali wana, elenge mwasi wana, ezali nani?”

²¹⁰ Bazalaki lisusu mibange te; ezalaki nde Abraham ná Sara. Mpe balimwaki. Batalaki: “Moto moko azotala biso.” Bazalaki na makoki ya kolimwa, kaka ndenge Ye alekaki na nzela ya etutu, bakómaki na nzoto ya ndenge moko. Aleluya! Ya solo. Basakoli nyonso ná bamosusu bazalaki kotambola zingazinga, kotala-tala engumba yango.

²¹¹ Mpe Yesu afungolaki mpenza nzela mpo na komata na, to komata koleka minzoto, sánza, mapata, mpe akambaki bakangami, apesaki makabo na bato. Yesu afandi lelo na loboko ya mobali ya Tata, amataki kuna likoló, afandaki, kino ntango banguna na Ye nyonso bákóma ebóngá ya makolo na Ye.

²¹² Mpe lelo, moninga na ngai molingami Moklisto, milimo mabe ezali kosala na ngámbo nyonso. Mpe Molimo na Nzambe ezali kokende liboso, na ngámbo mosusu, mpo na kotelemela yango ntango nyonso. Aleluya! Yango mpenza. Bazulunále, bansango, mpe nyonso mosusu, ezali kosakola yango. Bazali kotalela yango. Bazali kososola te oyo yango ezali. Ezali nini? Ezali etaliseli ya elilingi ya etumba monene oyo ezoya kala mingi te, kati na Nzambe ná zabolo. Yaka na ngámbo ya Nzambe mpe zala sembo na motema na yo. Amen.

213 Eleki ntango molai te awa, nazalaki kuna na Toledo, na Ohio, nazalaki na liyangani moko. Nalingi kosilisa.

214 Bomoni oyo nalingi koloba na ntina na milimo mabe? Bazali kosala mosala. Bazali basámбели mpenza, ná lolenge ya basámбели! Oh, bakendeke na losambo mikolo ya Lomingo nyonso, bazongelaka koloba Endimeli ya Bantóma, mpe bayembaka mpo na lokumu ya Nzambe. Oh la la! na lolenge ya basámбели mpenza na ndenge nyonso oyo bakoki!

“Ndeko Branham, olingi koloba ete ezali Solo?”

215 Yango nde lolenge ya molimo oyo ebakaki Yesu Klisto na ekulusu. Mpe Yesu alobaki: “Bino bouti na tata na bino, zabolo.”

216 Sikoyo, bamosusu kati na bango balobaki: “Oh, Russie nde motemeli-na-Klisto.” Ata moke te! Russie ezali motemeli-na-Klisto te. Motemeli-na-Klisto akozala mpenza mosambeli monene kino akopéngwisa ata Baponami, soki nde ekokoka.

Bómikanisela, Nzambe azuaka moto na Ye, kasi Molimo na Ye te. Zabolo azuaka moto na ye, kasi molimo na ye te. Sikoyo, bango wana. Bósala ndenge bolingi. Ngai nazali bobele na mokumba mpo na Solo.

217 Milimo mabe ezali kosala mosala! Lobi, nateyaki likoló na yango, na ngámbo ya nzoto. Lelo, nazali kotalisa bino ngámbo ya molimo, esika bazalaka na ngámbo ya basámбели. Esika oyo bazalaka kuna, oyo babengaka cancer, mpe oyo babengaka *oyo*, oyo *wana*, mpe oyo *mosusu*, kasi nasili kotalisa bino polele, na nzela na Biblia, ete ezali milimo mabe. Sikoyo, awa, lelo, bayei lisusu, na ngámbo ya basámбели, basámбели mpenza, ya boyambi mpenza.

218 Soki okoki kobanda, ndeko, kokanisa. Kaina, na ebandeli mpenza ya likambo yango, azalaki mosámбели mpenza. Esau azalaki mosámбели mpenza. Yudasi azalaki mosámбели mpenza. Ezali likambo ya losambo. Ezali mokili ya libanda te. Ezali mpenza likambo ya kati. Bótala yango malamumu, boyekoli milimo mabe! Ntango mosusu nsima na mwa ntango, na ntango moko boye, nakoki kolobela yango lisusu mwa moke koleka. Ntango ebandi koleka.

219 Kókweisa moto moko te. Linga moto nyonso. Soki okoki kolinga uta na motema na yo te, na bongo, Klisto azali elongo na yo te.

220 Na Toledo, na Ohio, nakotaki na restaurant moko ya moke. Nazalaki kolia na esika moko, na mwa esika moko ya Dunkard, mwa esika moko ya kitoko. Bazalaki malamumu mingi. Nsima ya nzánga wana, basilaki kokanga, mpo na kokende na eteyelo ya Lomingo. Mpe nsima na bango kokanga, esengelaki na ngai kokatisa balabala, na mwa esika moko boye ya lolenge ya mokili, mpe nakotaki kuna. Mpe nayebe ete kobeta masano ya mbongo elongobani te na mobeko, na Ohio. Mpe tala policier moko ya

etúka ná loboko na ye azingi elenge mwasi moko, loboko na ye ezalaki kokita awa, na ntólo ya mwasi yango, azobetáká lisano ya mbongo na masíni moko. Mibeko ya bitúka mpe ekólo na biso esili kokufa. Mawa!

²²¹ Natiaka motema na ngai na Klisto, Libanga ya makasi, esika natelemi, bisika mosusu nyonso ezali zelo ekozindaka. Eloko mosusu etikali te. Ya solo.

²²² Natalaki kuna na nsuka, namonaki elenge mwasi moko ya kitoko, akokaki kozala móseka, na mibu zomi na libwa, zomi na mwambe, zomi na libwa. Mpe oyo bazalaki kosala, bana mibali oyo bazalaki kuna na nsuka, zinga-zinga na mesa yango, ezalaki nsómo. Nafandaki wana. Sikoyo, eloko ekamwisaki ngai, efandaki ngai wana, esika oyo mwasi moko ayaki, alobaki: “Olingi kofanda?”

Nalobaki: “Matondi. Nalingaki kolia bilei ya ntongo.”

²²³ Mpe oyo afandaki na kiti awa, ezalaki mwasi moko ya mokóló, mokóló lokola mama na ngai, ya mibu ntuku mitano na mitano, ntuku mitano na mwambe. Azalaki na mwa elamba moko ya nsóni mpe mokuse, oyo balataka.

²²⁴ Balobaka ete epesaka mopepe. Science elobaka: “Bobéli libóma.” Solo mpenza, ezali bongo te. Bolingaka kaka kolakisa bolumbu na bino. Ezali nsóni, eloko ya kosambwisa. Mwasi ya kiló akolinga kolata yango te. Mwasi akolata na ye, kasi mwasi ya kiló te.

²²⁵ Bongo, na boye, bango... azalaki wana, afandaki wana. Misuni ya nzoto na ye esilaki kolemba. Apakolaki lángi lokola fololo ya orkidé, to soki bobengaka yango nini, na bibebú na ye. Mpe na mwa suki mikuse mpenza lokola mobali, elíngámálingámá; oyo Biblia elobi, ete ezali nsóni. Mpe mwasi, oyo mobali... .

²²⁶ Biblia elobi ete, soki mwasi akati suki na ye, mobali azali na ndingisa ya kobengana ye na libala, mpamba te azali sembo ná ye te. Tosengeli kofanda mpenza malamú mpe koteya Biblia, awa, moko na mikolo oyo. Elobi: “Soki mwasi akati suki na ye, azali koyokisa mobali na ye nsóni.” Soki ayokisi mobali nsóni, asengeli koboyama na libala. Okoki kobala mwasi mosusu te, kasi okoki kobengana ye na libala. Fiuu! Ah, wana, wana ezali matata, nayoki yango. Kasi ezali Solo.

²²⁷ Oh, kalakala, tozalaki na yango na misándá ya Molimo Mosanto, kasi tolembisi nsinga. Mobange ya ndeko moko azaláká koloba: “Tolembisi nsinga, tolembisi nsinga, tosali boyokani ná lisumu. Tolembisi nsinga, bampate babimi, kasi bantaba bakoti ndenge nini?” Bolembisi nsinga. Yango nde likambo. Bolembisi nsinga, mokili ná lingomba esangani. Kaka lokola Bamoábe ná bamosusu, mpe Balame, ndenge asalaki ete bábalana kati na bango, ekómi mpenza eloko yango moko lelo. Mpe lingomba esili kobeba nyonso, mpe eleko ya ba-Pantekotiste

ezali eleko ya Laodikia, oyo ekómi móto te, malili mpe te, mpe esanzami na monoko ya Nzambe. Mpe uta na etonga yango nyonso, Nzambe azali kobenga ndambo na Ye etikali, komema Ye na Ndako, ezali mpenza bongo, ya solo mpenza, na nzela ya lisekwa.

²²⁸ Mpe mwasi yango azalaki wana, afandaki wana, ná lángi na bibebú mpe na elongi na ye mobimba, mpe ezalaki na bisika nyonso, ndenge wana. Mpe apakolaki biloko oyo ya moindo likoló ya miso na ye, mpe azalaki kotoka, ezalaki kokita. Mpe mobange ya mwasi yango, ntango mosusu akokaki kozala na bankóko. Afandaki wana ná mibange mibali mibale, moko na bango azingaki kitambála ya monene na nkingo, mpe ezalaki na sanza ya motoba, afandaki wana. Mobali yango atelemaki, azalaki komela masanga, tóloba, ye mwasi yango mpe azalaki komela masanga. Mpe azalaki kotala-tala zingazinga.

²²⁹ Nakanisaki: “E Nzambe! Nzambe, mpo na nini Olongoli kaka eloko yango nyonso na mbala moko te? Mpo na nini Osali yango te? Mwana na ngai Sharon. . . Bébé na ngai moke, mwana na ngai Sara ná mwana na ngai Rebekah basengeli kokóla na ekeke oyo wana, mpo na koya kobunda na makambo ya boye?” Nakanisaki: “Tala awa, na ba-parc oyo mpe nyonso wana, ná makambo oyo ezali kosalema.” Nakanisaki: “E Nzambe! Oh, nasepeli ndenge Ozuaki Sharon, soki ezalaki mokano na Yo. Mwana na ngai Rebekah ná mwana—mwana na ngai Sarah basengeli nde kokóla na nsé ya makambo ya boye?” Elingi koloba, mpe bato yango babengaka bango. . . bayembaka na korále mpe nyonso wana. Mpe nakanisaki: “Ezali mpenza nsóni, boye te?” Nakanisaki: “E Nzambe, ndenge nini boyengebene na Yo ya Búlee ezali koyikela yango mpiko? Emonani lokola nkanda na yo ya boyengebene esengelaki kokende kuna mpe—mpe kopanza esika oyo.”

²³⁰ Mpe nayokaki Mwanje na Nkolo, koloba: “Yaka pembeni awa.” Nakendeki kuna. Mpe ntango Asilisaki ná ngai, namiyokaki lokola moto mosusu. “Mpo na nini ozali kokweisa ye?”

Nalobaki: “Tala kuna, ndenge mwasi yango azali.” Mpe tala ndenge Ye. . .

²³¹ Namonaki emononeli. Namonaki mokili moko, lokola *oyo*, ya libúngútulú, mokili mosusu. Kasi mokili oyo *awa*, monama moko ezingaki yango, mpe ezalaki Makila ya Klisto nde epekisaka nkanda ya Nzambe. Akoki kotala yango te, A—Akoboma yango na mbala moko, mpo Alobaki: “Mokolo okolia yango, mokolo yango okokufa.” Boye, Akosala yango.

²³² Na nsima nakanisaki boye. Namimonaki. Atako nasalaki yango te, kasi nazalaki mosumuki, ata bongo. Na bongo, Makila na Yesu Klisto, mpo na biso, esalaka lokola epekiseli. Bomoni? Mpo, soki nasali lisumu, masumu na ngai ebetaka Ye mpe

etutaka motó na Ye ya motuya, mpe nakokaki komona mpísoli mpe Makila kokita. “Limbisa ye, Tata, ayebi te eloko nini azali kosala.” Mpe nakosala likambo mosusu, mpe ebeti Yango. “Limbisa ye, Tata.”

²³³ Soki étikalaka koleka Ye, mbele nasílá kokufa. Mpe soki nátikalaka koyamba ngolu na Ye te, mpe mokolo elimo na ngai ekokende na ngámbo wana, nasili kosambisama. Naboyaki. Eloko mosusu etikali te, bobele kosambisama. Kosambisama, nasílá kosambisama. Nzambe alobaki: “Mokolo okolia yango, mokolo yango okokufa.” Bosili kosambisama malamú. Kiti-na-kosambisa yango oyo, nsima ya nzánga oyo, lolenge na yo epai na Klisto.

²³⁴ Na bongo nakanisaki: “Iyo, ezali ya solo.” Mpe namonaki ete mokolo moko nabendamaki ya kofukama kino epai na Ye. Namonaki buku na ngai ya kala, ezalaki wana, mosumuki, makambo nyonso ekomamaki kuna. Namonaki ete masumu na ngai nde ezalaki kosala yango, mpe nalobaki: “Nkolo, Okolinga kolimbisa ngai?”

²³⁵ Ye atiaki loboko na Ye na mopanzi na Ye, abimisaki mwa Makila, akomaki likoló na yango, mpe alobaki: “Olimbisami.” Abwakaki yango na mbu ya kobosana, mpo na kokanisa yango lisusu ata mokolo moko te. Elongwaki mpo na libela! Alobaki: “Ngai nalimbisi yo, kasi yo ozokweisa ye.”

Yango ebongolaki likanisi na ngai. Nalobaki: “Nkolo, yokela ngai mawa.”

²³⁶ Nsima na ngai kobima na emononeli yango, napusanaki mpe nafandaki. Nalobaki: “Mbote, madame?”

Alobaki: “Oh, mbote.”

²³⁷ Mpe nalobaki: “Soki okoki kolimbisa ngai,” nalobaki, “nkombo na ngai Rev. Branham, motei.”

Alobaki: “Oh, limbisa ngai. Limbisa ngai, Rev. Branham.”

²³⁸ Nalobaki: “Madame.” Nayebisaki ye likambo yango. Nalobaki: “Nazalaki wana, mpe nazalaki kokweisa yo, mpe nazalaki kokanisa: ‘Oyo likambo ya nsómo mpenza!’ Ntango mosusu ozali na bana.”

Alobaki: “Nazali na bango.”

²³⁹ Nalobaki: “Likambo nini esalaki ete makambo étambola malamú te?” Abandaki koyebisa ngai lisolo moko oyo ekosala mpasi mpenza na motema nyonso. Nalobaki: “Na—nazalaki kotuna Nzambe mpo na nini Alongolaki makambo nyonso oyo na mokili na mbala moko te. Tala, yo awa ná mibali mibale oyo balángwe masanga, yo moko mpe ozali ya kolangwa.” Mpe nalobaki: “Mokolo moko... Makila wana nde ezali kosala ete nkanda na Nzambe ézala mosika na yo. Okokufa, moko na mikolo oyo. Mpe, na bongo, ozali—ozali na bonsomi ya kopona sikoyo, okoki koboya to kondima.” Nalobaki: “Kasi mokolo

moko, elimo na yo ekokatisa na ngámbo kuna, esika mawa ekozala lisusu te. Mpe soki okufi na masumu na yo, osili kosambisama, mpe okokende na lífelo.”

²⁴⁰ Boyebi nini? Mwasi yango amibendaki na kiti wana kuna, na restaurant yango. Tosalaki liyangani ya mabondeli moko oyo botikalá koyóka te na bomoi na bino, mpe ayaki epai na Klisto. Ezalaki likambo nini? Bókweisaka bango te; bóyebisaka bango nde Nsango-malamu. Bakangami na molimo mabe; bazali bato ya mokili, kati na mosánda oyo. Babendamaka longwa na ngámbo oyo awa. Kobendama ya biso eutaka na likoló. Tótala ndenge tokoki kosala ná makabo na biso, mpo na komema bato mosusu epai na Klisto.

²⁴¹ Tata na biso na Likoló, natondi Yo mpo na bolamu mpe mawa na Yo. Limbisa ngai, Nkolo; ntango mosusu, bato, nakangi bango awa ntango molai mpenza. Kasi lokola ezali bosukisi ya mayangani nsima ya nzánga oyo, nalingaki koyebisa bango, “milimo mabe,” pe nakotisi makambo mingi koleka na esika moko, na liteya moko, kasi ntango mosusu bakoki kosimba yango, awa mpe kuna, mpe kososola oyo nalingaki koloba. Oyebi ba-mposa ya motema na ngai, ntina oyo natei yango.

²⁴² Tika ete bato bákende, nsima ya nzánga oyo, mpe mibali mpe basi básenzela na likambo nyonso bakosala, kasi bábika na esengo mpe nsomi. Tika báyebe ete Nzambe asílá kobikisa bango. Mpe tika ete bátala epai na Ye, bábosana mimesano nyonso mpe makambo oyo ezali zinga-zinga na bango, mpe bábika na kimia, na komipekisa, mpe na kobanga Nzambe. Na bongo, e Nzambe, ntango Okolinga kosalela bango mpo na likambo nyonso, Ókoka koloba na bango mbala moko mpe ótinda bango na esika nyonso oyo Okolinga ete bákende to nyonso oyo Okolinga ete básala. Tika ete bato bázala na komikitisa mpe bámona Klisto na mitema na bango. Limbisa biso, Nkolo, mabe na biso, moko na moko na biso.

²⁴³ Mpe toyebi ete—ete Satana azali kotambola lokola nkosi oyo azali konguluma, bisika nyonso, koliáká oyo alingi, alati molato ya basámbe. E Nzambe, bana mike babólá oyo, tálá bango, na bisika nyonso. Bazali polele mpe batiami liboso na bato. Nabondeli, e Nzambe, óyokela bango mawa, óbikisa babúngi nyonso, óbikisa babeli. Mpe, e Nzambe, tososoli ete milimo mabe ya bokono oyo ezolandáká bana na Yo, ete Ozali na elongolimasumu kuna, mpo na kotala likambo yango. Mpe milimo mabe nyonso oyo ekolinga komema bango na lisumu, Ozali na elongolimasumu kuna, oyo ekotala likambo yango. Mpe nabondeli ete Ókokisa yango na Nkombo na Yesu. Amen.

Nazali komituna soki e . . .



BOYEKOLI MILIMO MABE — NGÁMBO YA BASÁMBELI LIN53-0609A

(Demonology — Religious Realm)

MATEYA LIKOLÓ NA BOYEKOLI MILIMO MABE

Liteya ya Ndeko William Marrion Branham oyo, eteyamaki liboso na Anglais mokolo ya Mibale na nsima ya nzanga, mwa 9, na sanza ya Motoba, na mobu 1953, na Amphitheatre Roberts Park na Connersville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org